



74
6640
53



74
6640
53



五禮通考卷第一百三十八

內廷儀禮部右侍郎廣養用編輯

兩淮都轉鹽運使盧覓會

李天保總纂蘇都御史桐城方觀承同訂

直隸按察司副使元和宋宗元

參校

嘉禮十一

朝禮

宋史禮志宋承前代之制以元日五月朔冬至行大朝會之禮

樂志建隆元年改樂章十二順為十二安皇帝臨軒為隆安王公出入為正安皇帝食飲為和安建隆乾德朝會樂章二十八首

皇帝升座隆安 天臨有赫上法乾元鏗鏘六樂儼恪千官皇儀允肅五座居尊文明在御禮備誠存公卿入門正安 堯天協紀舜日揚光淑慎爾止率

五禮通考卷第一百三十八 朝禮

木下中也
991.4
寄贈

91-0730

由舊章佩環濟濟金石鏘鏘威儀炳煥至德昭彰
上壽禧安 乾健為君坤柔為臣惟其臣子克奉君
親永御皇極以綏兆民稱觴獻壽山岳嶙峋 舜韶
更奏堯酒浮觴皇情載懌洪算無疆基隆郊廓德茂
陶唐山巍日煥地久天長

蕙田案禧安為祭祀酌獻飲酒受胙之樂非
朝會所用以淳化景德樂章校之當作和安
皇帝舉酒第一盞用白龜 聖德昭宣神龜出焉載
白其色或游於川名符在沼瑞應巢蓮登歌丹陛紀
異靈篇

第二盞甘露 天德冥應仁澤載濡其甘如醴其凝
如珠雲表潛結顯英允敷降於竹帛永昭瑞圖
第三盞紫芝 煌煌茂英不根而生蒲茸奪色銅池

著名晨敷表異三秀分榮書於瑞輿光我文明

第四盞嘉禾 嘉彼合穎致貢升平異標南畝瑞應

西成德至於地皇祇效靈和同之象煥發祥經

第五盞玉兔 盛德好生網開三面明視標奇昌辰

乃見育質雪園淪精月殿著於樂章色含江練

蕙田案乾德四年判太常寺和峴言今年荆

南進甘露京兆東州進嘉禾黃州進紫芝和

州進綠毛龜黃州進白兔欲依月律撰神龜

甘露紫芝嘉禾玉兔五瑞各一曲每朝會登

歌首奏之詔如所請此則五曲乃乾德中所

增加今依宋志所編不復更析特著其說於

此

羣臣舉酒正安 戶牖嚴丹辰鵷鸞造紫庭懇祈南

岳壽勢拱北辰星得士於茲盛基邦固以甯誠明一
何至金石與丹青 簪紱若雲屯晨趨闔闔門僉僉
羅禹會濟濟奉堯罇周禮觀明備天儀仰睟溫高卑
陳表著同拱帝王尊 待漏造王庭威儀盛莫京紛
綸簪組列清冽珮環聲禮飲終三爵韶音畢九成永
圖鳧藻樂千載奉升平

羣臣第一蓋畢作元德升聞 治定資神武功成顯
睿文貢輸庭實旅朝會羽儀分偃革千年運垂衣萬
乘君孰知堯舜力明德日升聞 約法皇綱正崇文
寶歷昌適人振木鐸農器鑄干將瑞日含王字卿雲
藹帝鄉萬邦成一統鴻祚與天長
六變 宸辰威容盛聲明禮樂宣九州臻禹會萬國
戴堯天貢職輸琛費皇猷煥簡編含和均暢茂鳩慶

結非烟 朝會儼威儀司常建九旗舞容分綴兆文

物辨威蕤運格桃林牧祥開洛水龜帝功潛日用化

俗自登熙 螭階聊載筆紀瑞軼唐虞丹鳳儀金奏

黃龍負寶圖羣材薪棧樸仁政煦蒲盧蕩蕩巍巍德

豚魚信自孚 接聖宅神都方來五達區國賢熙帝

載靈命握乾符至化當純被斯文益誕敷車書今混

一聖治奉三無 聖王臨大寶八表奏才賢經緯文

天賦剛柔德日宣建邦隆柱石造物運陶甄共致升

平業綿長保億年 神化妙無方巍巍邁百王鶴書

搜隱逸龍陛策賢良拱揖朝羣后賓筵闢四方洪圖

基億載溘曜德彌光

第二蓋畢天下大定 皇猷敷八表武誼肅三邊蘭

錡韜兵日靈臺偃伯年奉珍皆述職削衽盡朝天功

德超前古音徽播管絃 伐叛天威震恢疆帝業多
削平倖肅殺涵煦極陽和 蹈厲觀周舞風雲入漢歌
功成推大定歸馬偃凋戈
六變 惕厲日乾乾潛蟠或躍淵伐謀參上策受鉞
總中堅田訟歸周日民謠戴舜年風雲自冥感嘉會
翼飛天 壺關方逆命投袂起親征虎旅聊攻伐梟
巢遽蕩平天威清朔漠仁澤被黎氓案節皇輿復洋
洋載頌聲 蠢茲淮海帥保據毒黎苗不悟龍興漢
猶同犬吠堯六師方雨施孤壘自冰消千載逢嘉運
華夷奉聖朝 上游荆楚要澤國洞庭深自識同文
世皆迴拱極心一戎聊仗鉞九土盡輸金大定功成
後薰風入舜琴 席卷定巴邛西遐盡率從岷峨難
負阻江漢自朝宗述職方舟集驅車九折通粲然書

國史冠古耀豐功 銳旅慶回旋邊防盡宴然鍵橐
方偃武飛將亦韜弦震曜資平壘文明協麗天沈沈
成大業赫奕在青編

蕙田案宋初郊廟殿庭通用文德武功之舞
乾德四年以和峴言改殿宇所用文舞爲元
德升聞之舞武舞爲天下大定之舞其武舞
一變象六師初舉二變象上黨咸平三變象
淮揚底定四變象荆湖歸復五變象叩蜀納
款六變象兵還振旅乃別撰舞曲樂章而文
德武功之舞請於郊廟仍舊通用然則元德
升聞以下十二曲亦乾德中所增加乃和峴
之詞今亦依宋志類編之不更析也

樂志元豐三年楊傑言大樂七失曰國朝郊廟之樂

先奏文舞次奏武舞而武舞容節六變一變象六師
初舉二變象上黨克平所向宜北三變象淮揚底定
所向宜東南四變象荆湖來歸所向宜南五變象邛
蜀納款所向宜西六變象兵還振旅所向宜北而南
今舞者發揚蹈厲進退俯仰既不足以稱成功盛德
失其所向而文舞容節尤無法度則舞不象成也
文獻通考建隆二年春正月朔帝御崇元殿受朝賀服
袞冕設宮懸仗衛如儀仗退羣臣詣皇太后宮門奉賀
上常服御廣德殿羣臣上壽用教坊樂 御殿儀仗者
本充庭之制唐禮殿庭屯門皆列諸衛黃麾大仗宋朝
太祖增創錯繡諸旗并旛斝等著於通禮正至五月一
日御正殿則陳之
宋史太祖本紀建隆三年春正月庚申朔以喪不受朝

禮志朝儀班序太祖建隆三年三月有司上合班儀太
師太傅太保太尉司徒司空太子太師太傅太保嗣王
郡王左右僕射太子少師少傅少保三京牧大都督大
都護御史大夫六尚書常侍門下中書侍郎太子賓客
太常宗正卿御史中丞左右諫議大夫給事中中書舍
人左右丞諸行侍郎祕書監光祿衛尉太僕大理鴻臚
司農太府卿國子祭酒殿中少府將作監前任節度使
開封河南太原尹太子詹事諸王傅司天監五府尹國
公郡公中都督上都護下都督太子左右庶子五大都
督府長史中都護下都護太常宗正少卿祕書少監光
祿等七寺少卿司業三少監三少尹少詹事左右諭德
家令率更令僕諸王府長史司馬司天少監起居舍人

侍御史殿中侍御史左右補闕拾遺監察御史郎中員外郎太常博士五府少尹五大都督府司馬通事舍人國子博士五經博士都水使者四赤令太常宗正祕書丞著作郎殿中丞尚食尚藥尚舍尚乘尚輦奉御大理正太子中允贊善中舍洗馬諸王友諮議參軍司天五官正凡雜坐者以此為準詔曰尚書中臺萬事之本而班位率次兩省官節度使出總方面古諸侯也又其檢校兼守官多至師傅三公而位居九寺卿監之下甚無謂也其給事諫議舍人宜降於六曹侍郎之下補闕次郎中拾遺監察次員外郎節度使升於六曹侍郎之上中書侍郎之下餘悉如故

職官志建隆以後合班之制中書令侍中同中書門下平章事以上為宰相親王樞密使畱守節度京尹兼中書令侍

中同中書門下平章事以上為宰相尚書令太師太尉太傅太

保司徒司空舊儀太師太傅太保為三公太尉司徒司空為三公太樞密

使知樞密院事參知政事舊在樞密使下樞密副使舊在知樞密院之上同知樞

密院事宣徽南院北院使簽書樞密院事參政以下班位太

子太師太傅太保左右僕射太子少師少傅少保諸府

牧開封河南應天大名江陵興元真定江南京兆鳳翔河中又有大都督大都護今皆領使無特為者御史大夫觀文殿大

學士舊無此位六尚書吏兵戶刑禮工左右金吾衛左右衛上將軍門下

中書侍郎舊在尚書下節度使秦甯武甯彰信鎮海天平安化武成忠武鎮海

鎮甯彰德永清安國威德靜難彰化雄武保泰淮南忠正保信保靜集慶建康甯

國鎮南昭信荆南南海武昌安遠武安鎮東平江鎮江宣德保甯康國威武建甯

益州安靜武信山南西道昭武安德武定甯海甯江武康清海靜江甯遠建武高

州定南密州靜海涼州西河沙州歸義洮州保順應州彭國威城昌化豐州天德

朔州振武觀文殿學士舊曰文明殿若學士資政殿大學士三司

使與觀文資政班位臨時取裁玉清昭應宮景靈宮會靈觀副使與三司使

翰林學士承旨翰林學士資政殿學士翰林侍讀

班位臨時取裁

時取裁

翰林學士

翰林學士

翰林學士

侍講學士龍圖閣學士天章閣學士樞密直學士龍圖

直學士天章直學士左右散騎常侍舊在諸衛上將軍下六統軍左右

左右羽林左右神武諸衛上將軍左右騎衛左右武衛左右屯衛左右領軍左右千牛衛太子賓客太常

宗正卿御史中丞權中丞立中丞專位內殿起居日止立本官班左右丞諸行侍郎節

度觀察留後給事中左右諫議大夫中書舍人知制誥

龍圖閣待制天章閣待制觀察使祕書監光祿衛尉太

僕大理鴻臚司農太府卿內客省使國子祭酒殿中少

府將作監景德殿使延福宮使客省使開封河南應天

大名尹太子詹事諸王傅司天監諸衛大將軍太子左

右庶子引進使防禦使齊濟沂登萊鄭汝蔡穎均鄆懷博磁洛棗深瀛雄霸莫代絳解龍和鄆舒復眉家陸果團

練使單漢維唐相冀三司鹽鐵度支戶部副使官至諫議大夫已上從本官玉

清昭應宮景靈宮會靈觀判官太常寺宗正少卿祕書

少監光祿等寺七寺少卿宣慶使四方館使國子司業

殿中少府將作少監開封河南應天大名少尹太子少

詹事左右諭德太子家令太子率更令太子僕諸州刺

史潘趙德濱保并汾澤遼憲嵐石號坊丹階乾商南原慶渭儀環楚秦泗濠光除通黃真舒江池饒信太平吉袁撫筠岳豐峽歸辰衡水全柳邵常秀溫台衢睦處南劍江漳綿漢彭邛蜀嘉簡黎雅維茂資榮昌普渠合戎盧典劍文集璧巴蓬龍施萬開達涪渝昭循朝連梅英賀封南雄端新康恩春惠韶梧藤龔冢潯貴賓橫融化寶高雷南儀欽諸王府長史司馬司天少監樞密都承

旨如客省使以下充者依本職同班如閣門使充即在閣門使之上如自見任內客省使以下轉南班官充亦與同班仍在舊職之上如自客省副使以下轉南班官充者在宣政使昭宣使東上西上閣門使樞密承旨

樞密副都承旨諸軍衛將軍起居郎起居舍人知雜御

史侍御史諸行郎中左右司吏部兵部司封司勳考功職方駕部庫部度支戶部金部倉部刑部都官比部司門禮部工部祠

部主客膳部屯田虞部水部

皇城以下諸司使皇城洛苑右驛驛尚食左驛驛御廚內藏庫軍器左藏儀鸞南作坊弓箭庫北

右藏殿西掖綿西京作坊鞍轡庫東染院酒坊西染院法酒庫禮賓翰林醫官

樞密院副承旨諸司副承旨如帶南班官者在諸司使之下不帶南班官者在皇城副使之上

殿中侍御史左右司諫諸行員外郎客省引進閣門副

使左右正言監察御史太常博士皇城以下諸司副使
 諸次府少尹大都督府左右司馬兗徐路陝揚杭越福通事舍人國
 子博士春秋禮記毛詩尚書周易博士都水使者開封
 祥符河南洛陽宋城縣令太常宗正祕書丞著作郎殿
 中丞內殿承制殿中省尚食尚藥尚衣尚舍尚乘尚輦
 奉御大理正太子中允左右贊善大夫內殿崇班閣門
 祇候太子中舍洗馬太子諸率府率左右衛左右監門左右清道左右司禁樞密
 院兵房吏房戶房禮房副承旨東頭西頭供奉官太子
 諸率府副率諸衛中郎將左右金吾左右衛左右千牛左右羽林郎將左右金吾左右衛
 右侍禁諸王友諸王府諮議參軍官高者從本官司天春官夏官
 中官秋官冬官正節度行軍司馬副使祕書郎左右班
 殿直著作佐郎大理寺丞諸寺監丞大理評事太學廣
 文博士太常太祝奉禮郎祕書省校書郎正字御史臺

諸寺監主簿國子助教廣文太學四門書學算學博士
 律學助教書算學無助教司天靈臺郎保章正挈壺正三班奉職
 借職防禦團練副使畱守京府節度觀察判官節度掌
 書記觀察支使防禦團練判官畱守京府節度觀察推
 官軍事判官防禦團練軍事推官軍監判官諸軍別駕
 長史司馬司錄錄事參軍司理參軍三京府軍巡判官在諸軍之下諸州
 諸司參軍軍巡判官諸縣令赤縣丞諸縣主簿尉諸軍
 文學參軍助教
 太祖本紀乾德元年春正月甲寅朔不御殿
 禮志乾德元年閏十二月詔自今一品致仕官曾帶平
 章事者朝會宜綴中書門下班
 二年二月詔重定內外官儀制有司請令上將軍在中
 書侍郎之下大將軍在少卿監之下諸衛率副率在東

宮三品之下內客省使視太卿客省使視太監引進使
視庶子判四方館事視少卿閣門使視少監諸司使視
郎中客省引進閣門副使視員外郎諸司副使視太常
博士通事舍人從本品供奉官視諸衛率殿直視副率
樞密承旨視四品朝官兼南班官諸司使者從本品副
承旨視寺監丞諸房副承旨視南省都事凡視朝官者
本品下視京官在其上

太祖本紀乾德三年春正月癸酉朔以出師不御殿
職官志乾德五年正月朔乾元殿受朝升節度使班在
龍墀內金吾將軍之上

太祖本紀開寶二年春正月己卯朔以出師不御殿
三年春正月癸卯朔雨雪不御殿 五年春正月壬辰
朔雨雪不御殿 六年春正月丙辰朔不御殿九月壬

申詔晉王光義班宰相上

禮志開寶六年九月詔曰周之宗盟異姓爲後此先王
所以睦九族而和萬邦也晉王親賢莫二位望俱崇方
資夾輔之功俾先三事之列宜位宰相上

太祖本紀開寶七年春正月庚戌朔不御殿 八年春
正月甲戌朔以出師不御殿

蕙田案文獻通考太祖建隆二年乾德四年
五年六年開寶九年俱元會

太宗本紀太平興國三年春正月丙戌朔不受朝羣臣
詣閣賀

宋史禮志羣臣上表儀通禮守官設次於朝堂文東武
西相對爲首設中書令位於羣臣之北禮曹掾舉表案
入引中書令出就南面立禮部郎中取表授中書令

即受表入奏其禮凡正至不受朝及邦國大慶瑞上尊
號請舉行大禮宰相率文武羣臣暨諸軍將校蕃夷酋
長道釋耆老等詣東上閣門拜表知表官跪授表於宰
臣宰臣跪授於閣門使乃由通進司奏御凡有答詔亦
拜受於閣門獲可奏者奉表稱賀其正至樞密使率內
班拜表長春殿門外亦閣門使受之

太宗本紀太平興國七年春正月甲午朔不受朝羣臣
詣閣稱賀

又淳化二年春正月壬申朔不受朝羣臣詣閣拜表稱
賀

文獻通考太宗淳化三年正月朔服袞冕御朝元殿受
朝賀禮畢改通天冠絳紗袍升座受羣臣等上壽帝即
位以來每朝賀畢退御大明殿常服上壽奏教坊樂至

是始命有司約開元禮定上壽儀皆以法服行禮設宮
懸萬舞酒三行而罷復舊制也又取嗣位以來祥瑞作
祥麟丹鳳白龜河清瑞麥五曲用之

宋史樂志太平興國九年亳州獻祥麟雍熙中蘇州貢
白龜端拱初澶州河清廣州鳳凰集諸州麥兩穗三穗
者連歲來上有司請以此五瑞為祥麟丹鳳河清白龜
瑞麥之曲薦於朝會用之淳化二年太子中允直集賢
院和嶠上言來歲正會之儀登歌五瑞之曲已從改製
則文武二舞亦當定其名周易有化成天下之辭謂文
德也漢史有威加海內之歌謂武功也望改殿庭舊用
元德升聞之舞為化成天下之舞天下大定之舞為威
加海內之舞其舞六變一變象登臺講武二變象漳泉
奉土三變象杭越來朝四變象克殄并汾五變象肅清

銀夏六變象兵還振旅每變樂章各一首詔可三年元
日朝賀畢再御朝元殿上壽復用宮縣二舞登歌五瑞
曲自此遂爲定制

淳化中朝會二十三首

上壽和安 四序伊始三陽肇開條風入律玉琯飛
灰望雲肅謁鳴佩斯來稱觴獻壽瞻拱星迴 一陽
應候萬國同文天正紀節太史書雲凝旒在御列敘
爰分壽觴斯薦祝慶明君

皇帝初舉酒用祥麟 聖王御寓仁獸誕彰在郊旅
貢游時呈祥星辰是稟草木無傷紀異信史登歌太
常

再舉酒丹鳳 九苞薦瑞戴德膺仁藻翰爰奮靈音
載振非時不見有道則臻降岐匪匹儀舜爲鄰

三舉酒河清 沔彼涇洟澄明鑑如清應寶運光涵

帝居洞分沈璧徹見游氣聖祚無極神休偉與

四舉酒白龜 稽彼靈物允昭聖皇浮石可躍巢蓮

益光金方正色介族殊祥信書永耀帝德無疆

五舉酒瑞麥 芄芄嘉麥擢秀分歧甘露夕灑惠風

晨吹良農告瑞循吏稱奇歸美英主折而貢之

羣臣初舉酒畢作化成天下 軒昊方同德成康初

比肩素風惟普暢皇道本無偏陰魄重輪滿陽精五

色圓要荒咸率服卓越聖功全 聖德比陶唐千年

祚運昌茂功雖不宰鴻業自無疆極塞成清謐齊民

益阜康文明同日月遐邇仰輝光

六變 蕩蕩無私世巍巍至聖君山河分國寶日月

耀人文厭浥凝甘露輪困吐慶雲正聲兼大雅洋溢

應南薰 鴻範合彝倫調元四序均成功天吏正御
苑物華新底貢陳方物來賓列遠人奉觴呈九奏嘉
貺動穹旻 大君隆至化興運契千齡覲禮俄班瑞
夷寶盡寶庭成文調露樂奉聖拱辰星舞佾方更進
朝陽上楚萍 禮樂昭王業寰區致太平革車停北
狩雲稼屢西成國有祥延詔鄉閭誦聲日華融五
色遐邇仰文明 亭障戢干戈人心浹太和務農登
寶穀獵俊設雲羅儀鳳書良史祥麟載雅歌嘉晨資
宴喜星拱弁峩峩 冠古耀鴻徽深仁及隱微二南
江漢詠九奏鳳凰飛設虞羅鐘律盈庭列舞衣文明
資厚德怡澤兆民歸
再舉酒畢威加海內 革輅征汾晉隳城比燎毛桓
桓勛軍旅將將禦英豪神武誠無敵天威詎可逃王

師宣利澤霈若沃春膏 振萬方明德疾徐咸可觀

鏗鏘動金奏蹈厲總朱干夾進昭威武申嚴警宴安

守方推猛士當用鷁爲冠

六變 宣榭始觀兵桓桓稱鼓行一戎期大定載纘

議徂征善政從師律神功莫武成勛哉勤誓眾王業

自經營 聲教方柔遠甌閩禮可招獻圖連日際歸

國象江湖撫運重熙盛提封萬里遙還同有虞氏文

德格三苗 南暨宣王化東吳奉乃神舞千方耀德

執玉自來賓巢伯朝丹陛韓侯覲紫宸古今歸一揆

懷遠道彌新 遺俗續陶唐來蘇後聖皇布昭湯弔

伐恢復漢封疆金鉞申戡翦朱干示發揚宜哉七德

頌千載播洋洋 乃眷嘗西顧偏師暫首征靈旗方

直指獷俗自亡精禹敘終馴致堯封漸化成不須嚴

尉候於廓海彌清 干戚有司傳威儀著凱旋眾成
王業盛役輟武功全兵寢西郊閱書惟北闕縣聖神
膺景命卜世萬斯年

太宗本紀雍熙元年春正月壬子朔不受朝羣臣詣閤
拜表稱賀 四年春正月甲子朔不受朝羣臣詣閤拜
表稱賀

端拱元年春正月己未朔不受朝羣臣詣閤拜表稱賀
二年春正月癸未朔不受朝羣臣詣閤拜表稱賀

淳化四年春正月庚寅朔享太室羣臣詣齋宮拜表稱
賀 五年春正月甲寅朔不受朝羣臣詣閤拜表稱賀

蕙田案文獻通考太宗興國五年六年八年
雍熙三年淳化元年三年竝元會

樂志真宗景德三年又爲朝會上壽之樂

景德中朝會一十四首

皇帝升座隆安 金奏在庭羣侯在位天威煌煌嚮

明負展高拱穆清弁冕端委盛德日新禮容有煒

公卿入門正安 萬邦來同九賓在位奉璋薦紳陟

降庭止文思安安威儀棣棣臣哉鄰哉介爾蕃祉

上壽和安 天威煌煌山龍采章庭實旅百上公奉

觴拱揖羣后端委垂裳永錫難老萬壽無疆

皇帝初舉酒祥麟 帝圖會昌二獸效祥雙角共舐

示武不傷四靈爲畜玄枵耀芒公族信厚元元阜康

再舉酒丹鳳 矯矯長離振羽來儀和音中律藻翰

揚輝珍符沓至品物攸宜至德元感受天之祺

三舉酒河清 德水湯湯發源靈長皎鑿澄徹千年

效祥積厚流溼資生阜昌朝宗潤下善利無疆

羣臣舉酒正安 思皇多士靖恭著位鳴玉飛綏鏘
鏘濟濟宴有折俎以示慈惠罔敢不祗福祿來暨
金奏在庭有酒斯旨顙顙叩嚮明負辰湛湛露斯
式宴以喜佩玉藻兮罔不由禮 酒以成禮樂以侑
食露湛朝陽星環紫極淑慎爾容既飽以德進退周
旋威儀抑抑

初舉酒畢盛德升聞 八佾具呈萬舞有奕既以象
功又以觀德進旅退旅執籥秉翟至化懷柔遠人來
格 闐闐天開羣后在位設業設虞庭燎晰晰斧辰
當陽虎賁夾陛舞之蹈之四隩來暨

再舉酒畢天下大定 武功既成綴兆有翼以節八
音以象七德僕僕蹲蹲朱干玉戚發揚蹈厲其儀不
忒 偃伯靈臺功成作樂以昭德容以清戎索萬邦

會同邪慝銷鑠盡善盡美佻彼韶節

降坐隆安 被袞當陽穆穆皇皇擊石拊石頌聲揚
揚和樂優洽終然允臧禮成而退荷天百祥

真宗本紀景德四年春正月己亥朔御朝元殿受朝
樂志大中祥符元年又作醴泉神芝慶雲靈鶴瑞木五
曲施於朝會宴享以紀瑞應

大中祥符朝會五首

皇帝舉酒醴泉 膺沸檻泉寒流清泚地不愛寶其
旨如醴上善至柔靈休所啟利澤無疆允資岱禮
再舉酒神芝 彼茁者芝茂英煌煌敷秀喬嶽實繁
其房適符修貢封巒允臧永言登薦抑惟舊章
三舉酒慶雲 惟帝佑德卿雲發祥紛紛郁郁五色
成章奉日逾麗回風載翔歌薦郊廟播厥無疆

四舉酒靈鶴 元文中錫嘉祥紹至偉茲胎禽羽族
之異翻翰來儀徘徊嘹唳祚聖儲休聿昭天意

五舉酒瑞木 天生五材木曰曲直維帝順天厚其
生植連理效祥成文表德總萃坤珍永光祕刻

真宗本紀大中祥符二年十二月辛巳詔晉國大長公
主薨罷明年元會 六年春正月癸巳朔上御朝元殿

受朝 八年春正月壬午朔謁玉清昭應宮奉表告尊
上玉皇大天帝聖號奉安刻玉天書於寶符閣還御崇

德殿受賀
蕙田案文獻通考真宗咸平景德元年四年
大中祥符六年竝元會其八年御崇德殿受

賀通考不及蓋是年以得天書尊上玉帝聖
號禮成受賀非受朝也崇道家之邪說廢朝

會之大典可謂不知務矣

文獻通考仁宗天聖四年帝詔輔臣曰朕欲元日率百
官先上太后壽然後御天安殿可令禮院草具其儀太

后曰豈可為吾故後元會禮哉宰相王曾因言陛下以
孝奉母儀太后以謙全國體請如太后命不聽詔中書

門下具儀注
蕙田案元會前先上太后壽始此

宋史禮志天聖五年正月朔曉漏未盡三刻宰臣百官
與遼使諸軍將校竝常服班會慶殿內侍請皇太后出

殿後幄鳴鞭升座又詣殿後皇帝幄引皇帝出帝服鞞
袍于簾內北向褥位再拜跪稱臣某言元正啟祚萬物

維新伏惟尊號皇太后陛下膺時納祐與天同休內常
侍承旨答曰履新之祐與皇帝同之帝再拜詣皇太后

御座稍東內給侍酌酒授內謁者監進帝跪進訖以盤
興內謁者監承接之帝卻就褥位跪奏曰臣某稽首言
元正令節不勝大慶謹上千萬歲壽再拜內常侍宣答
曰恭舉皇帝壽酒帝再拜執盤侍立教坊樂止皇帝受
虛醖還幄通事舍人引百官橫行典儀贊再拜舞蹈起
居太尉升自西階稱賀簾外降還位皆再拜舞蹈侍中
承旨曰有制皆再拜宣曰履新之吉與公等同之皆再
拜舞蹈閤門使簾外奏宰臣某以下進壽酒皆再拜太
尉升自東階翰林使酌御酒盞授太尉執盞盤跪進簾
外內謁者監跪接以進太尉跪奏曰元正令節臣等不
勝慶忭謹上千萬歲壽降還位皆再拜宣徽使承旨曰
舉公等觴皆再拜太尉升立簾外樂止內謁者監出簾
授虛盞太尉降階橫行皆再拜舞蹈宣徽使承旨宣羣

臣升殿再拜升及東西廂坐酒三行侍中奏禮畢退樞
密使以下迎乘輿于長春殿起居稱賀百官就朝堂易
朝服班天安殿朝賀帝服袞冕受朝禮官通事舍人引
中書令門下侍郎各於案取所奏文詣褥位脫劍舄以
次升分東西立諸方鎮表祥瑞案先置門外左右令使
絳衣對舉給事中押祥瑞中書侍郎押表案入分詣東
西階下對立既賀更服通天冠絳紗袍稱觴上壽止舉
四爵乘輿還內恭謝太后如常禮

蕙田案元會前上太后壽儀注始此

仁宗本紀慶歷元年春正月辛亥朔御大慶殿受朝

七年春正月丙子朔御大慶殿受朝

皇祐五年春正月壬寅朔御大慶殿受朝

嘉祐元年春正月甲寅朔御大慶殿受朝

三編卷三十一
三十一
蕙田案文獻通考仁宗天聖五年慶歷元年三年七年皇祐五年嘉祐元年七年竝元會又案英宗享國日淺正冬五月朔受朝之儀概未及舉故通考不載

神宗本紀治平四年十二月辛酉以來歲日食正旦自乙丑避殿減膳罷朝賀

熙甯四年春正月丁亥朔不視朝

樂志熙甯中朝會三首

皇帝初舉酒慶雲 乾坤順夷皇有嘉德爰施慶雲
承日五色輪囷下乘萬物皆飾惟天祚休長彼無極
再舉酒嘉禾 彼美嘉禾一莖九穗農疇告祥史牒
書瑞擊壤歡歌如京委積畱獻春種昭錫善類
三舉酒靈芝 皇仁溥博品物蕃滋慶祥回復秀發

神芝靈華雙舉連葉四施披圖案牒永享純禧

文獻通考元豐元年詔右諫議大夫宋敏求權御史中丞蔡確樞密副使承旨張誠一直舍院同判太常寺李清臣詳定正旦御殿儀注敏求等遂上朝會儀二篇令式四十卷詔頒行

元正冬至大朝會儀注

前期有司設御座于大慶殿東西房於御座之左右少北東西閣於殿後百官宗室客使次於朝堂之內外五輅先陳於庭兵部設黃麾仗于殿之內外太樂令展宮架之樂于橫街南鼓吹令分置十二案於宮架外協律郎二人一位於殿上西階之前楹一位於宮架西北俱東向陳輿輦御馬於龍墀繖扇於沙墀貢物於宮架之南東西相向餘則列於大慶門之外冬至不設貢物扶持執事侍

立官及諸司使副立於左右樞密院諸房副承旨承制
以下立於殿下東西相向重行異位北上典儀設三師
三公侍中中書令左右僕射開府儀同三司位於丹墀
香案之南少東次尚書左丞位於其後皆北面西上親
王位於香案之南少西北面東上上壽則知同知樞密院事位於親王之後門下
侍郎位於其東次左散騎常侍次給事中左諫議大夫
次左司諫正言皆重行位於其後觀文資政殿大學士
學士端明殿學士位於次南並西南北上中書侍郎位
于其西次右散騎常侍次中書舍人右諫議大夫次右
司諫正言皆重行位於其後翰林學士承旨至寶文閣
學士位於次南次樞密直學士以下次待制皆重行位
于其後並東西北上起居郎舍人夾香案東西相向契
丹使位於龍墀上少西北面東上宗姓節度使以下至

率府副率位於橫街南分東西相對班各重行異位北
上左右巡使位於次南東西相向宮架前少東則特進
以下至未升朝官班各重行異位北面西上夏國使在
宮架之東軍員位於其後夏國人從次之宮架前少西
則御史臺班節度以下又位於西並重行北面東上皆
視特進退一列外高麗國使在宮架之西軍員位于其
後高麗人從次之諸蕃客位于次西陪位進奏官位于
宮架之南諸道貢舉解首位于其後皆北面而設敘班
位於大慶門外東西相對以北為上中書侍郎諸方鎮
表案於右給事中祥瑞案於左冬至不設給事中祥瑞案下同其日闕大
慶門列黃麾仗張旗幟羣官宗室使各服其服以俟太
樂令帥樂工入太常卿立於宮架前協律郎就舉麾位
中書侍郎以諸方鎮表給事中以祥瑞案令史對舉

侍衛官各就列輦出至西閣降輦符寶郎奉寶俱詣閣奉迎有司引祕書監以下次御史知雜以下次宗姓及外任防禦使以下就位侍中版奏中嚴復位少頃奏外辦閣簾捲殿上鳴蹕太樂令撞黃鐘之鐘右五鐘皆應內侍承旨索扇扇合皇帝服通天冠絳紗袍御輿出西閣協律郎俛伏舉麾興奏乾安之樂鼓吹振作皇帝出自西房降輿卽御座南向扇開殿下鳴蹕協律郎偃麾戛敵樂止鑪烟升符寶郎奉寶置御座前尚書左右丞以上門下中書省官及待制以上至大學士正議大夫以上御史中丞以上宗姓及外正任觀察使以上契丹使班分東西各以次入奏正安之樂就位樂止中書侍郎押表案入詣西階下東向立給事中押祥瑞案入詣東階下西向立押樂官歸本班起居畢復案位三師

以下至尚書左右丞親王以下至百官及御史臺官外正任契丹使俱就北向位贊者曰拜在位者皆再拜舞蹈三稱萬歲再拜訖又再拜太尉將升中書令門下侍郎俱降至兩階下立冬至門下侍郎不奏下同太尉詣西階下行則樂作至位樂止升階中書令門下侍郎各於案取所奏以次升中書令取方鎮官最高一表分東西立太尉詣御座前北向俛伏跪奏文武百僚太尉具官臣某等言元正起祚萬物咸新冬至云曆運推移日南長至伏惟皇帝陛下膺乾納祐與天同休俛伏興降階侍中詣東階升殿立俟太尉還位贊者曰拜在位者皆再拜舞蹈三稱萬歲再拜引侍中進當御座前承旨退臨階西向稱有制贊者曰拜在位者皆再拜宣曰履新之慶冬至云履長之慶與公等同之贊者曰拜在位者皆再拜舞蹈三稱萬歲再拜侍中少退引北

向班各方東西序立中書令進當御座前北向俛伏跪
奏中書令具官臣某奏諸方鎮表摺笏讀訖執笏俛伏
興少退東向立門下侍郎詣御座前奏祥瑞如諸方鎮
表儀奏畢置所奏於案南中書侍郎給事中俱還本班
案退戶部尚書詣橫街南承制位俛伏跪奏具官某言
諸州貢物請付所司俛伏興侍中前承旨退西向曰制
可侍中少退舍人曰拜戶部尚書再拜還本班次引禮
部尚書就位俛伏跪奏具官臣某言諸蕃貢物請付所
司俛伏興侍中前承旨退西向曰制可侍中少退舍人
曰拜禮部尚書再拜還本班冬至不奏祥瑞貢物太史令就位俛伏
跪奏具官臣某言某年某月日雲物祥瑞請付史館俛
伏興侍中前承旨退西向曰制可侍中少退舍人曰拜
太史令再拜還本班侍中進當御座前俛伏跪奏侍中

具官臣某言禮畢俛伏興還位內侍承旨索扇扇合殿
下鳴蹕太樂令合撞鞀賓之鐘左五鐘皆應協律郎跪
俛伏舉麾興太樂令合奏乾安之樂鼓吹振作皇帝降
座御輿入自東房還東閣扇開偃麾戛鼓樂止侍中奏
解嚴百官退還次有司設食案太樂令設登歌于殿上
二舞入架於架南預坐當升殿者位于御座之前文武
相向異位重行以北為上非升殿者位于東西廊下尚
食奉御設壽尊于殿上之東楹少南南向設坫于尊南
加爵一尊坫酒爵以金玉器充有司設上下羣官酒尊於殿下東西廂
侍衛官及執事者各立于其位百官入就位侍中版奏
中嚴復位少頃奏外辨閣簾捲殿上鳴蹕太樂令合撞
黃鐘之鐘右五鐘皆應內侍承旨索扇扇合皇帝服通
天冠絳紗袍御輿出東閣協律郎俛伏舉麾興奏乾安

之樂鼓吹振作皇帝出自東房降輿卽御座南向扇開
殿下鳴蹕協律郎偃麾戛鼓樂止爐烟升三師以下至
尚書左右丞親王以下至同知樞密院事及百官御史
臺官外正任契丹使俱就北向位贊者曰拜在位者皆
再拜三稱萬歲北向班分東西立光祿卿詣橫街南北
向俛伏跪奏具官臣某言請允羣臣上壽俛伏興侍中
詣東階升進御座前承旨退臨階西向日制可侍中少
退舍人曰拜光祿卿再拜訖復位三師以下就北向位
贊者曰拜在位者皆再拜三稱萬歲太尉自東階升詣
酒尊所北向尚食奉御酌酒一爵授太尉太尉搢笏執
爵詣御座前跪進皇帝執爵太尉執笏俛伏興少退當
御座前俛伏跪奏文武百官太尉具官臣某等稽首言
元正首祚冬至云天正長至臣等不勝大慶謹上千萬歲壽俛伏

興退階復位贊者曰拜在位者皆再拜三稱萬歲侍
中承旨退臨階西向宣曰舉公等觴贊者曰拜在位者
皆再拜三稱萬歲北向班分東西序位太尉自東階升
侍立皇帝舉第一爵作和安之樂飲訖樂止太尉受虛
爵復於坵降階三師以下復北向位贊者曰拜在位者
皆再拜舞蹈三稱萬歲又再拜侍中自東階升進御座
前俛伏跪奏侍中具官臣某言請延公王等升殿俛伏
興降階復位侍中承旨退稱有制贊者曰拜在位者皆
再拜宣曰延公王等升殿贊者曰拜在位者皆再拜舞
蹈三稱萬歲再拜公王等詣東西階升於席後立尚食
奉御進酒殿中監省酒以進皇帝第二爵升殿羣官就
橫行位舍人曰各賜酒贊者曰拜上下羣官皆再拜三
稱萬歲舍人曰就坐太官令行酒羣官搢笏受觶作正

安之樂文舞入立宮架北觴行一周太官令奏樂止尚
食奉御進食置御座前又詔羣官食太官令奏作盛德
升聞之舞曲舞作三成止出殿中監進皇帝第三爵酒
羣官立於席後登歌作嘉禾之曲飲訖樂止殿中監受
虛爵舍人就坐羣官皆坐太官令行酒作正安之樂武
舞進觴又行一周樂止尚食奉御進食置御座前又設
羣官食太官令奏酒周巡食徧如前儀作天下大定之
舞曲舞作三成止出殿中監進皇帝第四爵酒登歌作
靈芝之曲其禮如第三爵太官令行酒如第二爵又一
周樂止舍人曰可起百僚立於席後侍中進當御座前
俛伏跪奏侍中具官臣某言禮畢俛伏與羣官俱降
復位贊者曰拜羣官皆再拜舞蹈三稱萬歲再拜起分
東西序立內侍承旨索扇扇合殿下鳴蹕大樂令合撞

蕤賓之鐘左五鐘皆應協律郎跪俛伏舉麾與太樂令
令奏乾安之樂鼓吹振作皇帝降座御輿入自東房還
閣扇開夏啟樂止侍中奏解嚴有司承旨放仗羣官再
拜乃退

宋敏求又言考工記天子執冒四寸以朝諸侯未有臨
臣子而執鎮圭唐六典元正冬至大朝會止有進爵之
禮開寶通禮始著元會執圭出自西房淳化中又以上
壽進酒以內侍捧圭臣等遠稽周制近考唐禮皆爲未
合其元會受朝賀請不執鎮圭上壽準此

宋史神宗本紀元豐二年夏四月癸亥定正旦御殿儀
秋七月戊寅詳定朝會儀

樂志元豐二年詳定所以朝會樂而有請者十其一唐
元正冬至大朝會迎送王公用舒和開元禮以初入門

舒和之樂作至位樂止蓋作樂所以待王公今中書門下親王使相先於丹墀上東西立皇帝升御座乃奏樂引三品以上官未爲得禮請侍從及應赴官先就立位中書門下親王使相諸司三品尚書省四品及宗室將軍以上班分東西入正安之樂作至位樂止其二今朝會儀舉第一爵宮縣奏和安之曲第二第三第四登歌作慶雲嘉禾靈芝之曲則是合樂在前登歌在後有違古義請第一爵登歌奏和安之曲堂上之樂隨歌而發第二爵笙入奏慶雲之曲止吹笙餘樂不作第三爵堂上歌嘉禾之曲堂下吹笙瑞木成文之曲一歌一吹相間第四爵合樂奏靈芝之曲堂上下之樂交作

蕙田案詳定所議樂曲節奏有登歌笙入間歌合樂次序與古雅樂合

神宗本紀元豐三年春正月乙丑朔以代行太皇太后在殯不視朝 五年春正月癸未朔不受朝 六年春正月丁丑朔御大慶殿受朝始用新樂

蕙田案文獻通考神宗熙寧五年元豐六年竝元會

文獻通考哲宗卽位禮部言冬至正旦在諒闇當罷朝賀欲令羣臣於東上閣門內東門表賀從之

宋史哲宗本紀元祐三年春正月己酉朔不受朝 四年春正月壬申朔不受朝羣臣及遼使詣東上閣門內東門拜表賀十二月癸丑更定朝儀二舞曰威加四海化成天下 五年春正月丁卯朔御大慶殿視朝 六年春正月辛酉朔不受朝羣臣及遼使詣東上閣門內東門拜表賀 八年春正月己卯朔不受朝

禮志元祐八年太常博士陳祥道言貴人賤馬古今所同故觀禮馬在庭而侯氏升堂致命聘禮馬在庭而賓升堂私覲今元會儀御馬立於龍墀之上而特進以下立於庭是不稱尊賢才體羣臣之意請改儀注以御馬在庭于義為允

哲宗本紀紹聖四年春正月丙戌朔不受朝羣臣及遼使詣東上閣門拜表賀

元符元年春正月庚戌朔不視朝

樂志元符大朝會三首

皇帝初舉酒靈芝 嘉瑞降臨應我皇德燿燿神芝
不根而植春秋三秀晝夜一色物播詩歌聲被金石
再舉酒壽星 倬彼星象於昭於天維南有極離丙
之躔既明且大應聖乘乾誕受景福億萬斯年

三舉酒甘露 泣泣零露雲英醴溢和氣凝津流甘

委白飴泛泮林珠聯竹柏天不愛道聖功允格

哲宗本紀元符二年春正月甲辰朔御大慶殿以雪罷朝羣臣及遼使詣東上閣門拜表賀羣臣又詣內東門賀如儀

蕙田案文獻通考哲宗元祐五年紹聖三年
竝元會

徽宗本紀大觀二年春正月壬子朔受八寶於大慶殿
蔡京表賀符瑞

禮志新儀成改元豐儀太尉為上公侍中為左輔中書令為右弼太樂令為大晟府盛德升聞為天下化成之舞天下大定為四夷來王之舞及增刑部尚書奏天下斷絕請付史館餘竝如舊儀凡遇國恤則廢若無事不

視朝則下敕云不御殿羣臣進表稱賀於閣門

蕙田案文獻通考徽宗大觀二年政和八年
宣和六年竝元會

欽宗本紀靖康元年春正月丁卯朔受羣臣朝賀

陳隨隱上壽拜舞記凡正旦朝賀一十九拜三舞蹈

初面西立上升座閣門起居班首以下躬身北面

舍人宣名訖聽贊拜兩拜舞蹈如前禮躬身

奏聖躬萬福聽贊拜兩拜起直身立

班首復位聽贊拜兩拜

舞蹈如初起躬身

班首復位聽贊拜兩拜舞蹈如初

文獻通考建炎之初鑿輿南幸庶事未備而朝會之儀

未暇舉焉正至但循例宰臣率文武百官拜表稱賀而

已紹興改元以道君皇帝淵聖皇帝北狩權宜皇帝躬

率百僚遙拜畢次御常御殿朝參官起居

宋史高宗本紀紹興元年春正月己亥朔帝在越州帥

百官遙拜二帝不受朝賀二年春正月癸巳朔帝在

紹興府率百官遙拜二帝不受朝賀三年春正月丁

巳朔帝在臨安率百官遙拜二帝不受朝賀四年春

正月辛亥朔帝在臨安率百官遙拜二帝

禮志紹興十二年十月臣僚言竊以元正一歲之首冬

至一陽之復聖人重之制為朝賀之禮焉自上世以來

未之有改也漢高祖以五年即位而七年受朝於長樂

宮我太祖皇帝以建隆元年即位受朝於崇元殿主上

臨御十有六年正至朝賀初未嘗講艱難之際宜不違

暇茲者太母還宮國家大慶四方來賀宜惟其時欲望

自今元正冬至舉行朝賀之禮以明天子之尊庶幾舊
典不至廢墜禮部太常寺考定朝會之禮依國故事設
黃麾大仗車輅法物樂舞等百寮服朝服再拜上壽宣
王公升殿間飲三周詔自來年舉行十一月權禮部侍
郎王賞等言朝會之制正旦冬至及大慶受朝賀係御
大慶殿其文德紫宸垂拱殿禮制各有不同月朔視朝
則御文德殿謂之前殿正衙仍設黃麾半仗紫宸垂拱
皆係側殿不設儀仗元正在近大慶殿之禮事務至多
乞候來年冬至別行取旨詔從之
文獻通考紹興十三年閤門言依汴京故事遇大行大
禮則冬至及次年正旦朝會皆罷 十四年九月有司
言明年正旦朝會請權以文德殿爲大慶殿合設黃麾
大仗五千二十七人欲權減三分之一合設八寶於御

座之東西及登歌宮架樂舞諸州諸蕃貢物行在致仕
官諸路貢士舉首竝令立班詔從之 十五年正旦御
大慶殿受朝文武百官朝賀如儀

建炎以來朝野雜記大朝會者紹興十一年十月詔
來歲舉行之王望之爲禮部侍郎言排辦不及請自
來年冬至旣而不果十五年正月朔旦乃克行用黃
麾仗三千三百五十八人視東都舊儀損三之一時
無大慶殿遂權於崇政殿行之以殿狹輦出房不鳴
鞭它如故事是日設宮架樂百官朝服上壽如儀自
是一行而止

宋史樂志紹興十五年正旦朝會始陳樂舞公卿奉觴
獻壽首奏和安次奏瑞木成文滄海澄清瑞粟呈祥三
曲其樂專以太簇爲宮太簇之律生氣湊達萬物於三

統爲人正於四時爲孟春故元會用之
紹興朝會十三首

皇帝升座乾安

鈞陳肅列金奏充庭頤印南面如

日之升垂衣拱手治無能名順履獻歲大安大榮

公卿八門正安

升降

天子當陽臣工率職流水朝宗

眾星拱極環佩鏘鏘威儀抑抑上下交欣同心同德

上公上壽和安

八音克諧萬舞有奕上公奉觴率

茲百辟聲效呼嵩祝聖人壽億載萬年天長地久

皇帝初舉酒瑞木成文 厚地效珍嘉木紀瑞匪刻

匪雕具文見意三登太平允協聖治詩雅詠歌有光

既醉

再舉酒滄海澄清

百谷王符聖治不揚波效殊祉

德淪淵滄海清應千秋敘五行

三舉酒瑞粟呈祥

至治發聞惟馨香播厥百穀臻

穰穰農夫之慶歲其有禾易長畝盈倉箱時和物阜

粟滋茂嘉生駢穗來呈祥自今以始大豐美行旅不

用齋餼糧

羣臣酒行正安

羣公卿士咸造在庭式燕以衍恩

均露零穆穆明明於斯爲盛歸美報上一人有慶

明明天子萬福來同嘉賓式燕曷不肅雍燕以示慈

式禮莫愆樂胥君子容止可觀

酒一行文舞

帝德誕敷銷鑠羣慝近悅遠來惟聖

時克玉振金聲治功興起韶箎象之盡善盡美 文

物以紀藻色以明禮備樂舉適觀厥成睿知有臨誕

敷文德教雨化風洽此四國

酒載行武舞

用戒不虞謹能去兵師出以律動必

有名折彼遐衝布昭聖武和眾安民時惟多助 止
戈曰武惟聖為能御得其道無敢不庭整我六師稽
諸士德不吳不揚有嚴有翼

皇帝降座乾安 帝座熒煌庭紳肅穆對揚天休各
恭爾服頌聲洋洋彌文郁郁禮備樂成永膺多福

高宗本紀三十一年春正月甲戌朔以日食不受朝

孝宗本紀隆興元年春正月壬辰朔羣臣朝于文德殿

光宗本紀紹熙三年春正月乙巳朔帝有疾不視朝

五年春正月癸亥朔帝御大慶殿受羣臣朝

續文獻通考理宗紹定元年春正月御文德殿羣臣朝

賀 四年十二月詔正旦大朝會權免

右宋正旦朝賀

五禮通考卷第一百三十八

五禮通考卷第一百三十九

內廷供奉禮部侍郎金匱秦蕙田編輯

兩淮都轉鹽運使德水盧冕曾

李太保總督蘇都御史桐城方觀承同訂

直隸按察司副使元和宋完 參校

嘉禮十二

朝禮

遼史禮志正旦朝賀儀 臣僚并諸國使昧爽入朝奏
班齊皇帝升殿坐契丹舍人殿上通訖引契丹臣僚東
洞門入引漢人臣僚并諸國使西洞門入合班舞蹈五
拜鞠躬平身引親王東階上殿欄內褥位俛伏跪自通
全銜臣某等祝壽訖俛伏興退引東階下殿復位舞蹈
五拜畢鞠躬宣徽使殿上鞠躬奏臣宣答稱有敕班首
以下聽制訖再拜鞠躬宣徽傳宣云履新之慶與公等
同之舍人贊謝宣諭拜舞蹈五拜贊各祗候分班引出

引班首西階上殿奏表目訖教坊起居賀十二拜畢贊各祇候引契丹漢人臣僚并諸國使東西洞門入合班再拜贊進酒引親王東階上殿就欄內褥位搢笏執臺琰進酒訖退復褥位置臺琰出笏少前俛伏自通全銜臣某等謹進千萬歲壽酒俛伏興退復褥位與殿下臣僚皆再拜鞠躬俟宣徽使殿上鞠躬奏臣宣答稱有制親王以下再拜如初儀傳宣云飲公等壽酒與公等內外同慶舍人贊謝宣諭如初贊各祇候親王搢笏執臺琰殿下臣僚分班皇帝飲酒教坊奏樂殿上下臣僚皆拜呼萬歲贊各祇候樂止教坊再拜皇帝卒飲親王進受琰復褥位置臺琰出笏搢臣僚合班引親王東階下殿復位鞠躬再拜贊各祇候分班引出皇帝起詣皇太后殿臣僚并諸國使皆從皇太后升殿皇帝東方側坐

引契丹漢人臣僚并諸國使兩洞門入班稱賀進酒皆如皇帝之儀畢引出教坊入起居進酒亦如之皇太后宣答稱聖旨契丹班謝宣宴上殿就位立漢人臣僚并諸國使東洞門入丹墀東方面西鞠躬舍人鞠躬通文武百僚宰臣某以下謝宣宴再拜出班致詞訖退復位舞蹈五拜贊各上殿祇候引宰臣以下并諸國使副方裊朶殿臣僚西階上殿就位立不應坐臣僚並於西洞門出二人監琰教坊再拜贊各上階下殿謝宴如皇太后生辰儀

拜表儀 其日先於東上閣門陳設壇位分引南北臣僚諸國使副於壇位合班通事舍人二人昇表案置班首前揖鞠躬再拜平身中書舍人立案側班首跪搢笏興捧表跪左膝以表授中書舍人出笏就拜興再拜中

書舍人復置表案上通事舍人昇表案於東上閣門入
捲班分引出禮畢元日皇帝不御座行此儀餘應上表
有故皆倣此

樂志正月朔日朝賀用宮懸雅樂元會用大樂曲破後
用散樂角觚終之是夜皇帝燕飲用國樂

太祖本紀太祖二年春正月癸酉朔御正殿受百官及
諸國使朝 七年春正月甲辰朔以用兵免朝

太宗本紀會同四年十一月壬午以永寧天授二節及
正旦重午冬至臘竝受賀著爲令 五年春正月丙辰

朔上在歸化州御行殿受羣臣朝以諸道貢物進太后
及賜宗室百僚

大同元年春正月丁亥朔備法駕入汴御崇元殿受百
官賀

穆宗本紀應歷十八年春正月乙酉朔宴於宮中不受
賀 十九年春正月己卯朔宴宮中不受賀

聖宗本紀統和元年春正月戊午朔以大行在殯不受
朝

道宗本紀太康三年冬十二月丙寅預行正旦禮 六
年冬十二月丁亥預行正旦禮

大安四年冬十二月癸卯朔預行正旦禮
壽隆七年春正月壬戌朔力疾御清風殿受百官及諸

國使賀

右遼正旦朝賀

金史禮志元日聖誕上壽儀 皇帝升御座鳴鞭報時
畢殿前班小起居各復侍立位舍人引皇太子并臣僚
使客合班入至丹墀舞蹈五拜平立閣使奏諸道表目

皇太子以下皆再拜引皇太子升殿褥位搢笏捧盞盤進酒皇帝受置於案皇太子退復褥位轉盤與執事者出笏二閣使齊指入欄子內拜跪致辭云元正啟祚品物咸新恭惟皇帝陛下與天同休若聖節則云萬壽令節謹上壽卮伏願皇帝陛下萬歲萬歲萬歲祝畢拜興復褥位同殿下羣僚皆再拜宣徽使稱有制在位皆再拜宣答曰履新上壽與卿等內外同慶聖節則曰得卿壽酒與卿等內外同慶詞畢舞蹈五拜齊立皇太子搢笏執盤臣僚分班教坊奏樂皇帝舉酒殿上下侍立臣僚皆再拜皇太子受虛璣退立褥位轉盤璣與執事者出笏左下殿樂止合班在外臣僚皆再拜分引與宴官上殿次引宋國人從至丹墀再拜不出班奏聖躬萬福再拜唱有敕賜酒食又再拜各祇候平立引左廊立

次引高麗夏人從如上儀畢分引左右廊立御果牀入進酒皇帝飲則坐宴侍立臣皆再拜進酒官接盞還位坐宴官再拜復坐行酒傳宣立飲訖再拜坐次從人再拜坐三盞致語指臣使并從入立誦口號畢坐宴侍立官皆再拜坐次從人再拜坐食入七盞曲將終指從人立再拜畢引出間曲時指臣使起再拜下殿果牀出至丹墀合班謝宴舞蹈五拜各祇候分引出

熙宗本紀皇統三年正月己丑朔以皇太子喪不御正殿羣臣詣便殿稱賀宋高麗夏使詣皇極殿遙賀世宗本紀大定二年正月戊辰朔日有食之伐鼓用幣上徹樂減膳不視朝

章宗本紀明昌元年正月丙辰朔改元以世宗喪不受朝賀二年正月庚戌朔以世宗喪不受朝三年正

月乙巳朔以皇太后喪不受朝 四年正月己巳朔以皇太后喪不受朝

宣宗本紀貞祐二年春正月丁卯朔以邊事未息詔免朝賀

興定四年春正月壬辰朔詔免朝 五年正月丙戌朔免朝

元光元年正月庚戌朔免朝 二年正月甲辰朔詔免朝賀

右金正旦朝賀

元史憲宗本紀八年戊午春正月朔幸也里本朶哈之地受朝賀

世祖本紀至元六年冬十月己卯定朝儀服色 八年春三月甲戌敕元正聖節朝會凡百官表章外國進獻

使臣陛見朝辭禮儀皆隸侍儀司

禮樂志八年八月己未初起朝儀

輟耕錄至元初尚未遑興建宮闕凡遇稱賀則臣庶皆集帳前無尊卑貴賤之辨執法官厭其喧雜揮杖擊逐之去而復來者數次翰林承旨王磐時兼太常卿慮將貽笑外國奏請立朝儀遂如其言

元正受朝儀 前期三日習儀於聖壽萬安寺或大興教寺前二日陳設於殿庭至期大昕侍儀使引導從護尉各服其服入至寢殿前捧牙牌跪報外辦內侍入奏出傳制曰可侍儀俛伏與皇帝出閣陞輦鳴鞭三侍儀使并通事舍人分左右引擎執護尉劈正斧中行導至大明殿外劈正斧直正門北向立導從倒卷序立惟扇置於錡侍儀使導駕時引進使同內侍官引宮人擎執

禮樂志卷三十九 朝禮

五

導從入至皇后宮庭捧牙牌跪報外辦內侍入啟出傳
旨曰可引進使俛伏興皇后出閣陞輦引進使引導從
導至殿東門外引進使分退押直至聖塗之次引導從
倒卷出俟兩宮陞御榻鳴鞭三劈正各退立於露階東
司晨報時雞唱畢尙引引殿前班皆公服分左右入日
精月華門就起居位相向立通班舍人唱曰左右衛上
將軍兼殿前都點檢臣某以下起居尙引唱曰鞠躬曰
平身引至丹墀拜位知班報班齊宣贊唱曰拜通贊贊
曰鞠躬曰拜曰興曰拜曰興曰都點檢稍前宣贊報曰
聖躬萬福通贊贊曰復位曰拜曰興曰拜曰興曰平身
曰搢笏曰鞠躬曰三舞蹈曰跪左膝三叩頭曰山呼曰
山呼曰再山呼凡傳山呼控鶴呼諫應和萬歲
興曰拜曰興曰拜曰興曰平立官贊唱曰各恭事兩班

點檢宣徽將軍分左右升殿宿直以下分立殿前尙廊
分立仗南管旗分立大明門南楹俟后妃諸王駙馬以
次賀獻禮畢典引引丞相以下皆公服入日精月華門
就起居位通班唱曰文武百僚開府儀同三司錄軍國
重事監修國史右丞相具官臣某以下起居典引贊曰鞠
躬曰平身引至丹墀拜位知班報班齊宣贊唱曰拜通
贊贊曰鞠躬曰拜曰興曰拜曰興曰平身曰搢笏曰鞠
躬曰三舞蹈曰跪左膝三叩頭曰山呼曰山呼曰再山
呼曰出笏曰就拜曰興曰拜曰興曰拜曰興曰平身侍
儀使詣丞相前請進酒雙引升殿前行樂工分左右引
登歌者及舞童舞女以次升殿門外露階上登歌之曲
各有名音中本月之律先期儀鳳司運諸翰林院撰詞肆之丞相至宇下禱位
立侍儀司分左右北向立俟前行色曲將半舞旋列定

通贊唱曰分班樂作侍儀司引丞相由南東門入宣徽使奉隨至御榻前丞相跪宣徽使立於東南曲終丞相祝贊曰溥天率土祈天地之洪福同上皇帝皇后億萬歲壽宣徽使答曰如所祝丞相俛伏興退詣進酒位尚醞官以觴授丞相丞相搢笏奉觴北面立宣徽使復位前行色降舞旋至露階上教坊奏樂樂舞至第四拍丞相進酒皇帝舉觴宣贊唱曰殿上下侍立臣僚皆再拜通贊贊曰鞠躬曰拜曰興曰拜曰興曰平身丞相三進酒畢以觴授尚醞官出笏侍儀使雙引自南東門出復位樂止至元七年進酒儀班首至殿前待位立前行進曲尚醞官執空盃自正門出授班首班首搢笏執空盃由正門入至御榻前跪俟曲終以盃授尚醞官出笏祝贊宣徽使曰諾班首俛伏興班首宣徽使由南東門出各復位班首以下無階而呼五拜百官分班教坊奏樂尚醞官進酒殿上下侍立臣僚皆再拜三進酒畢班首降至丹階至元十八年十二月二十八日改今儀通贊贊曰合班禮部官押進奏表章禮物一案至橫階下宣禮物舍人進讀禮物目至

第一重階俟進讀表章官等翰林國史院屬官一人至宇下齊跪宣表目舍人先讀中外百司表目翰林院官讀中書省表畢皆俛伏興退降第一重階下立俟進讀禮物舍人陞階至宇下跪讀禮物目畢俛伏興退同降至橫階隨表章西行至右樓下侍儀仍領之禮物東行至左樓下太府受之宣贊唱曰拜通贊贊曰鞠躬曰拜曰興曰平身曰搢笏曰鞠躬曰三舞蹈曰跪左膝三叩頭曰山呼曰山呼曰再山呼曰出笏曰就拜曰興曰拜曰興曰拜曰興曰平立僧道耆老外國番客以次而賀禮畢大會諸王宗親駙馬大臣宴饗殿上侍儀使引丞相等陞殿侍宴四品已上賜酒殿上典引引五品以下賜酒於日精月華二門之下宴畢鳴鞭三侍儀使導駕引進使導后還寢殿如來儀

蕙田案至元朝儀定於劉秉忠許衡之手其
儀注頗依倣前代爲之惟太常陳燕樂不陳
雅樂遂使三朝大會不聞大成雅樂之音至
帝后並坐正殿則歷代所未有者

輟耕錄大明門在崇天門內大明殿之正門也七間
三門日精門在大明門左月華門在大明門右皆三
間一門大明殿乃登極正旦壽節會朝之正衙也十
一間寢室五間東西夾六間後蓮香閣三間中設七
寶雲龍御榻白蓋金縷褥並設后位諸王百僚怯薛
官侍宴坐牀重列左右

春明夢餘錄元大朝殿上設漏案香案酒海殿門外
中道設褥位丹陛中道設鳴鞭丹墀中道設香案又
設表案禮物案中道南東西設樂位設內黃麾立仗

設外牙門立仗又酒海之前一人手執玉鉞立於階
下鉞乃殷時之物長三尺有奇廣半之通體花紋宋
藏宣和殿中爲金所得後歸元以爲大寶其服制祀
天則服大裘而加袞正旦聖節則常衣不被袞冕惟
祀宗廟則服之內庭大宴則服質孫質孫者華言一
色服也其臣下朝會之服則用唐宋公服一品紫玉
帶二品紫犀帶三品四品紫金帶五品紫角帶六品
七品緋角帶八品九品綠角帶其京官賜宴則有質
孫其制冬之服凡九等大紅納石失大紅怯絲里大
紅官素一桃紅藍綠官素各一紫黃鴉青各一納石
失者金錦也怯絲里者翦絨也

世祖本紀十一年春正月己卯朔宮闕告成帝始御正
殿受皇太子諸王百官朝賀二十三年春正月戊辰

朔以皇太子故罷朝賀 二十四年春正月壬申御正殿受諸王百官朝賀 二十九年春正月甲午朔以日食免朝賀

成宗本紀大德十一年春正月丙辰朔帝大漸免朝賀 武宗本紀至大四年春正月癸酉朔帝不豫免朝賀 仁宗本紀延祐七年春正月辛巳朔日有食之輟朝賀 癸未帝御大明殿受諸王百官朝賀

順帝本紀元統二年冬十月乙卯朔正內外官朝會儀班次一依品從

王圻續通考元統二年蘇天爵奏曰朝觀會同國家大體班制儀式不可不肅夫九品分官所以著尊卑之序四方述職所以同遠近之風蓋位序尊嚴則觀望隆重朝廷典獻莫大於斯邇年以來朝儀雖設版位品秩率

越班行均為衣紫從五與正五雜居其曰服緋七品與六品齊列下至八品九品莫不皆然夫既踰越班制遂致行立不端因忘肅敬之心殊失朝儀之禮今後朝賀行禮聽讀詔赦先儘省部院臺正從二品衙門次諸司局院各驗職事散官序列正從班次濟濟相讓與與而行如有踰越品秩差亂班序者同失儀論以懲不恪庶幾貴賤有章儀式不紊上尊朝廷之典禮下聳中外之觀瞻

順帝本紀至正七年春正月甲辰朔日有食之大寒而風朝臣仆者數人

右元正旦朝賀

明史禮志太祖洪武元年九月定正旦朝會儀與登極略相仿

蕙田案續文獻通考在十月與志不同

明太祖實錄凡正旦冬至先日內使監陳御座香案於奉天殿設皇太子親王次於文樓侍儀司設表案於丹墀內道西北文武官起居位於文武樓南東西向一品二品拜位於內道上之東西三品以下拜位於內道下每等異位重行北面使者位於文武官拜位之東北面西上殿前班侍從班諸執事起居位於文武官起居位北東西向捧表官宣表目官展表官於表案西東向糾儀御史二位於表案南東西向宿衛鎮撫二位於東西陛下護衛百戶二十四位於鎮撫南稍後典牧所官二位於乘馬前東西向司晨郎報時位於內道中文武官拜位北知班二位於文武官拜位北東西向通贊贊禮二位於知班北通贊西贊禮東引文武班四位於文武官

拜位北稍後東西向引殿前班二位於引武班南引使者二位於引文班南舉表案二位於引武班北舉殿上表案二位於西陛下東向其丹陛上設皇太子親王拜位於中洪武二十六年改定皇太子親王朝賀於乾清宮殿前班指揮司官三侍立位於其西宣徽院官三侍立位於其東相向儀鸞司官位於殿中門左右護衛千戶八位於殿東西門左右典儀二位於陛上南將軍六於殿門左右天武將軍四於陛上四隅皆東西相向鳴鞭四列於殿前班之南北面殿上設寶案於正中表案於其南皇太子親王位於表案南文官侍從起居注給事中殿中侍御史尚寶卿位於殿東武官侍從懸刀指揮位於殿西相向受表兼受表目官位於文官侍從南西向內贊二又位於南東西相向捲簾將軍二位於簾前東西相向翌明金吾衛設鹵

簿陳五輅列甲士於午門外列旗仗於奉天門外陳儀仗於丹陛上及丹墀左右拱衛司設拜褥於皇太子親王位典牧所設乘馬於文武樓南各三東西向和聲郎陳樂於丹墀文武官拜位南侍儀司舍人二舉表案入就殿上位舍人二以表函置於案舉入丹墀位鼓初嚴百官朝服次嚴齊班於午門外東西以北爲上通班贊禮宿衛鎮撫入就位諸侍衛官各服其器服及尚寶卿侍從官入詣謹身殿鼓三嚴文武官以次入侍儀奏外辦皇帝服袞冕御輿出仗動大樂鼓吹振作尚寶卿捧寶侍儀侍衛導從警蹕升座樂止將軍捲簾尚寶卿置寶於案拱衛司鳴鞭司晨郎報時雞唱訖諸侍從官拱衛司官由殿西門出降自西階引班引入起居位通班贊某衛指揮使臣某以下起居樂作四拜樂止贊禮贊

鞠躬指揮使以下皆鞠躬贊聖躬萬福復位贊拜樂作四拜樂止通班贊各供事殿前班侍從班及諸執事就位引進引皇太子及親王由奉天東門入樂作陞自東階至丹陛拜位樂止贊拜樂作四拜興樂止導詣奉天殿東門入樂作內贊導至御座前樂止贊跪皇太子親王皆跪皇太子稱賀曰長子某茲遇履端之節冬至則謹曰履長率諸弟某等欽詣父皇陛下稱賀制曰履端之慶與長子等同之贊俯伏興導由東門出樂作引進導復丹陛拜位樂止贊拜樂作四拜興樂止降自東階樂作至文樓樂止司晨再報時訖通班贊丞相名臣某以下起居引班導文武百官入拜位北面立初行樂作至位樂止知班唱班齊贊禮贊拜樂作四拜興樂止引班導丞相詣西階樂作丞相升捧表及展宣等官從行至殿西門

樂止內贊引丞相至御座前贊跪贊禮贊眾官皆跪承
相奏具官臣某等茲遇三陽開泰萬物維新冬至則日律應黃鍾日當長至
欽惟皇帝陛下膺乾納佑奉天永昌贊俛伏興丞相及
眾官皆興內贊導丞相出殿西門樂作降自西階復位
樂止捧表以下官由殿西門入內贊贊進表捧表官跪
進於案前受表官於案東搯笏跪受置於案出笏興退
復位捧表官出笏興退立於殿內之西東向贊宣表宣
表曰官展表目官詣案前搯笏跪展宣畢展表目官出
笏復位宣表目官俛伏興以表目復於案出笏退復位
宣表官展表官詣案前搯笏跪展宣畢展官出笏一人
以表復於案俱退宣表官俛伏興同捧表以下官出殿
西門降自西階復位贊禮贊拜樂作四拜樂止給事中
詣御座前跪承制由殿中門出至丹陛上東南西向稱

有制百官皆跪宣皇帝制曰履端之慶與卿等同之冬至
長給事中由西門入跪奏承制畢俛伏興復位贊禮贊
俛伏興搯笏鞠躬三舞蹈跪山呼各拱手加額呼萬歲
者三凡呼樂工軍校齊聲擊鼓應之出笏俛伏興樂作
四拜樂止侍儀奏禮畢鳴鞭皇帝興樂作警蹕侍從導
引至謹身殿樂止舍人各奉表案出丞相以下皆出朝
賀畢錫宴於謹身殿內使監陳御座拱衛司設黃麾仗
及擎執於殿庭如朝儀設皇太子座於御座東偏西向
諸王座以次南東西相向殿內設三品以上官座庶下
設四品至九品座文武西重行異位和聲郎於殿南
楹陳大樂細樂及諸舞隊宣徽院陳食案於殿中及東
西廡皇帝常服陞座鼓吹振作鳴鞭樂止皇太子親王
就位丞相率禮部尚書宣徽使進御食案侍郎宣徽同

知進太子親王食案丞相進壽花於御前禮部工部尚書進壽花於太子親王前百官各就位諸執事進壽花於百官訖內使監令御前行酒司壺行太子以下酒細樂作和聲郎北面舉手稱上酒飲畢樂止內使監令御前進食供食供太子以下食大樂作和聲郎北面舉手稱上食食畢樂止凡酒七行進食五次樂作止如初酒第五行及第七行雜呈諸隊舞宴畢皇帝興大樂作太子親王還宮樂止文武官以次出

王圻續通考洪武二年正月甲子以羣臣每遇正旦聖壽朝賀行禮呼萬歲者三雖云臣子祝上實亦虛詞因諭宰臣更其詞八月庚午禮部尚書崔亮太常少卿陳味言舊制朝賀之禮贊禮者既唱三舞蹈訖復三唱山呼而羣臣拱手加額與樂工軍校齊聲稱萬歲者三近

改擬山呼為贊呼百官應之曰天輔有德曰海宇咸寧曰聖躬萬福臣等竊謂殿庭之禮主於尊嚴贊呼之際貴於齊一今百官三呼應聲喧嘩不齊誠為失儀況山呼故事甚為嚴肅宜仍其舊從之

明史樂志定朝會宴饗之制凡聖節正旦冬至大朝賀和聲郎陳樂於丹墀百官拜位之南北向駕出仗動和聲郎舉麾奏飛龍引之曲樂作陞座樂止偃麾百官拜奏風雲會之曲拜畢樂止丞相上殿致詞奏慶皇都之曲致詞畢樂止百官又拜奏喜昇平之曲拜畢樂止駕輿奏賀聖朝之曲還宮樂止百官退和聲郎樂工以次出凡宴饗和聲郎四人總樂舞二人執麾立樂工前之兩旁二人押樂立樂工後之兩旁殿上陳設畢和聲郎執麾由兩階升立於御酒案之左右二人引歌工樂工

由兩階升立於丹陛上之兩旁東西向舞師二人執旌引武舞士立於西階下之南又二人執翽引文舞士立於東階下之南又二人執幢引四夷舞士立於武舞之西南俱北向武舞曰平定天下之舞象以武功定禍亂也文舞曰車書會同之舞象以文德致太平也四夷舞曰撫安四夷之舞象以威德服遠人也引大樂二人執戲竹引大樂工陳列於丹陛之西文武二舞樂工列於丹陛之東四夷樂工列於四夷舞之北俱北向駕將出仗動大樂作升座樂止進第一爵和聲郎舉麾唱奏起臨濠之曲引樂二人引歌工樂工詣酒案前北面重行立定奏畢偃麾押樂引眾工退第二奏開太平之曲第三奏安建業之曲第四奏削羣雄之曲第五奏平幽都之曲第六奏撫四夷之曲第七奏定封賞之曲第八奏

大一統之曲第九奏守承平之曲其舉麾偃麾歌工樂工進退皆如前儀進第一次膳和聲郎舉麾唱奏飛龍引之樂大樂作食畢樂止偃麾第二奏風雲會之樂第三奏慶皇都之樂第四奏平定天下之舞第五奏賀聖朝之樂第六奏撫安四夷之舞第七奏九重歡之樂第八奏車書會同之舞第九奏萬年春之樂其舉麾偃麾如前儀九奏三舞既畢駕興大樂作入宮樂止和聲郎執麾引眾工以次出

洪武三年定朝賀樂章陞殿奏飛龍引之曲百官行禮奏風雲會之曲丞相致詞奏慶皇都之曲復位百官行禮奏喜昇平之曲還宮奏賀聖朝之曲俱見後宴饗九奏中

三年定宴饗樂章

一奏起臨濠之曲名飛龍引 千載中華生聖主王
氣成龍虎提劍起淮西將勇師雄百戰收強虜 驅
馳鞍馬經寒暑將士同甘苦次第靜風塵除暴安民
功業如湯武

二奏開太平之曲名風雲會 玉壘瞰江城風雲繞
帝營駕樓船龍虎縱橫飛礮發機驅六甲降虜將勝
胡兵 談笑掣長鯨三軍勇氣增一戎衣宇宙清寧
從此華夷歸一統開帝業慶昇平

三奏安建業之曲名慶皇都 虎踞龍蟠佳麗地真
主開基千載風雲會十萬雄兵屯鐵騎臺城守將皆
奔潰 一洗煩苛施德惠里巷謳歌田野騰和氣王
業宏開千萬世黎民咸仰雍熙治
四奏削羣雄之曲名喜昇平 持黃鉞削平荆楚清

吳越清吳越暮秦朝晉幾多豪傑 幽燕齊魯風塵

潔伊涼蜀隴人心悅人心悅車書一統萬方同轍

五奏平幽都之曲名賀聖朝 天運推遷虜運移王
師北討定燕畿百年禮樂重興日四海風雲慶會時
除暴虐撫瘡痍漠南爭覩舊威儀君王聖德容降
虜三恪衣冠拜玉墀

六奏撫四夷之曲名龍池宴 海波不動風塵靜中
國有真人文身交趾瓊裘金齒重譯來賓 奇珍異
產梯山航海奉表稱臣白狼元豹九苞丹鳳五色麒麟

七奏定封賞之曲名九重歡 乾坤清廓論功定賞
策勳封爵玉帶金符貂蟬簪珥形圖麟閣 奉天洪
武功臣佐興運文經武略子子孫孫尊榮富貴久長

安樂

八奏大一統之曲名鳳凰吟 大明天子駕飛龍開疆宇定王封江漢遠朝宗慶四海車書會同 東夷西旅北戎南越都入地圖中遐邇暢皇風億萬載時和歲豐

九奏守承平之曲名萬年春 風調雨順徧乾坤齊慶承平時節玉燭調和甘露降遠近桑麻相接偃武修文報功崇德率土皆臣妾山河磐固萬方黎庶歡悅 長想創業艱難君臣曾共埽四方豪傑露宿宵征鞍馬上歷盡風霜冰雪朝野如今清甯無事任用須賢哲躬勤節儉萬年同守王業

以上九奏前三奏和緩中四奏壯烈後二奏舒長其曲皆按月律按

武舞曲名清海宇 拔劍起淮土策馬定寰區王氣

開天統寶歷慶乾符武略文謨龍虎風雲創業初將軍星繞弁勇十月彎弧選騎平南楚結陣下東吳跨蜀驅胡萬里山河壯帝居

文舞曲名泰階平 乾坤清甯治功告成武定禍亂文致太平郊則致其禮廟則盡其誠卿雲在天甘露零風雨時若百穀登禮樂雍和政刑肅清儲嗣既立封建乃行讒佞屏四海賢俊立朝廷玉帛鐘鼓陳兩楹君臣賡歌揚頌聲

四夷舞曲 其一 小將軍大明君定宇寰聖恩寬掌江山東虜西戎北狄南蠻手高擎寶貝盤 其二 殿前歡五雲宮闕連霄漢金光明照眼玉溝金水聲潺潺頰顙觀趨蹌看儀鑾嚴肅百千般威人心膽寒 其三 慶新年虎豹關文武班五綵閒慶雲朝霞燦黃

金殿喜氣增丹墀內仰聖顏翠繞紅圍錦繡班高樓
十二欄笙簫趁紫壇仙音韻瑤箏按拜舞齊歌謠讚
吾皇萬壽安 其四過門子定宇寰定宇寰掌江山
撫百變謳歌拜舞仰祝讚萬萬年帝業安

朝賀洪武三年定丹陛大樂簫四笙四篳篥四方響四
頭管四龍笛四琵琶四箏六杖鼓二十四大鼓二板二
明太祖實錄三年六月甲子禮部尙書崔亮等言朝儀
貴乎整肅禮文不可乖錯今定大朝會常朝及內外官
辭謝奏事侍班等禮付侍儀司行之侍儀職專贊引凡
侍立班序告示引進通贊承奉知班都知舍人贊引執
事殿中侍御史職專糾劾殿廷失儀者監察御史職專
糾舉大朝會百官失儀者知班職專檢察班行日與侍
儀司官隨同朝班出入有失儀者以報殿中侍御史糾

治從之 七月戊子禮部尙書崔亮奏定大朝會錫宴
文三品武四品以上上殿者賜坐墩其制皇太子親王
青質蟠螭雪花飾宰相一品赤質雲花飾二品以下蒲
墩無飾其朝退燕閒及行幸處則中書省大都督府官
二品以上臺官三品以上及勳舊之臣文學之臣賜坐
者加絨罽繡褥命如式製之

明史樂志宴饗之曲後凡再更四年所定一曰本太初
二曰仰大明三曰民初生四曰物品亨五曰御六龍六
曰泰階平七曰君德成八曰聖道行九曰樂清寧其詞
詹同陶凱所製也 十五年所定一曰炎精開運二曰
皇風三曰眷皇明四曰天道傳五曰振皇綱六曰金陵
七日長楊八曰芳醴九曰駕六龍
十五年重定宴饗九奏樂章

一奏炎精開運之曲 炎精開運篤生聖皇大明御
極遠紹虞唐河清海宴物阜民康威加夷獠德被戎
羌八珍有薦九鼎馨香鼓鐘鐻鐻宮徵洋洋怡神養
壽理陰順陽保茲遐福地久天長

二奏皇風之曲 皇風被八表熙熙聲教宣時和景
象明紫宸開繡筵龍袞曜朝日金鑪裊祥烟濟濟公
與侯被服麗且鮮列坐侍丹扆磬折在周旋羔豚升
華俎玉饌充方圓初筵奏南風繼歌賡載篇瑤觴欣
再舉拜俯禮無愆同樂及斯辰於皇千萬年

奏平定天下之舞曲名清海宇 同前
三奏眷皇明之曲 赫赫上帝眷我皇明大明既集
本固支榮厥本伊何育德春宮厥支伊何藩邦以甯
慶延百世澤被羣生及時爲樂天祿是膺千秋萬歲

永觀厥成

奏撫安四夷之舞曲名小將軍殿前歡慶新年過門

子俱同

四奏天道傳之曲 馬負圖兮天道傳龜載書兮人
文宣義畫卦兮禹疇敘皇極建兮合自然絲絲歷數
歸明主祥麟在郊威鳳舞九夷入貢康衢謠聖子神
孫繼祖武垂拱無爲邁前古

奏車書會同之舞曲名泰階平 同前

五奏振皇綱之曲 周南詠麟趾卷阿歌鳳凰藹藹
稱多士爲楨振皇綱赫赫我大明德尊踰漢唐百揆
修庶績公輔理陰陽我冠正襟佩都俞在高堂坐令
八紘內熙熙民樂康氣和風雨時由疇見豐穰獻禮
過三爵歡娛良未央

六奏金陵之曲 鍾山蟠蒼龍石城踞金虎千年王
氣都於今歸聖主六代繁華經幾秋江流東去無時
休誰言天塹分南北英雄豈但嗤曹劉我皇昔住濠
梁屋神遊天錫真人服提兵乘勢渡江來詞臣早獻
金陵曲歌金陵進珍饌諧八音繼三歎請觀漢祖用
兵時爲嘗馮異滹沱飯

七奏長楊之曲 長楊曳綠黃鳥和鳴菡萏呈鮮紫
燕輕盈千花浥露日麗風清及時爲樂芳尊在庭管
音嘒嘒絲韻泠泠玉振金聲各奏爾能播國老載
勸載懲明德惟馨垂之聖經唐風示戒永保嘉名無
已太康哲人是聽

八奏芳醴之曲 夏王厭芳醴商湯遠色聲聖人示
深戒千春垂令名惟皇登九五玉食保尊榮日昃不
違餐布德延羣生天庖具豐膳鼎鼐事調烹豈但資
肥甘亦足養遐齡達人悟茲理恆令五氣平隨時知
有節昭哉天道行

九奏駕六龍之曲 日麗中天漏下遲公卿侍宴多
令儀簫韶九奏觴九獻鑪烟細逐祥風吹羣臣舞蹈
天顏喜歲熟民康常若此六龍回駕鳳樓深寶扇齊
開扶玉几景星呈瑞慶雲多兩曜增暉四序和聖人
道大如天地歲歲年年奈樂何

進膳曲水龍吟 寶殿祥雲紫氣濛聖明君龍德宮
氤氳霧靄檜柏閒青松龍樓鳳閣雕梁畫棟此是蓬
萊洞

太平清樂曲太清歌 萬國來朝進貢仰賀聖明主
一統華夷普天下八方四海南北東西託聖德勝堯

王保護家國太平天下都歸一將兵器銷為農器旌
旗不動酒旗招仰荷天地 上清歌 一願四時風
調雨順民心喜攝外國將寶貝攝外國將寶貝見君
王來朝寶殿裏珊瑚瑪瑙玻璃進在丹墀 開天門
託長生日月光天德萬萬歲永固皇基公卿文武
來朝會開玳筵捧金盃

迎膳奏水龍吟曲與進膳同陞座還宮百官行禮奏
萬歲樂朝天子二曲與朝賀同

明會典洪武十六年正旦以高皇后喪服親王及文武
衙門進到表箋先期三日捧進是日皇帝詣几筵殿祭
祀畢常服御奉天殿百官常服行五拜三叩頭禮
王圻續通考十六年正月乙巳朔皇太子親王駙馬俱
淺色常服詣華蓋殿行八拜禮帝御奉天殿受百官朝

賀畢賜宴華蓋殿不舉樂以皇后喪故也

明會典洪武二十二年令凡遇大朝賀除已習儀及具
服官員許入班其餘便服人員止於午門外行禮執事
官於華蓋殿行禮排甲帶刀侍衛之人免拜五府六部
等官於殿前侍立奏事止于華蓋殿

王圻續通考二十六年六月壬寅命禮官重定正旦冬
至朝會儀

明會典正旦冬至百官朝賀儀洪武二十六年定凡正
旦冬至前一日尚寶司陳御座於奉天殿及寶案於御
座之東設香案於丹陛之南教坊司設中和韶樂於殿
內之東西北向其日清晨錦衣衛陳鹵簿儀仗於丹陛
及丹墀之東西設明扇於殿內東西列車輅步輦於丹
墀東西相向鳴鞭四人左右北向教坊司陳大樂於丹

陸之東西北向儀禮司設同文玉帛案於丹陛之東金
吾衛設護衛官於殿內及丹陛之東西陳甲士於午門
外奉天門外及丹墀東西錦衣衛設將軍於奉天門外
丹陛丹墀及奉天門列旗幟於奉天門外東西典牧官
陳仗馬犀象於文武樓南東西相向欽天監設司晨郎
報時位於內道東近北立糾儀御史二人於丹墀北東
西相向內贊二人於殿內外贊二人於丹墀北東西相
向設傳制宣表等官位於殿內東西相向鼓初嚴文武
官具朝服齊班於午門外鼓次嚴引禮引百官由左右
掖門入詣丹墀東西北向立鼓三嚴執事官詣華蓋殿
伺候內官跪奏皇帝具袞冕陞座鐘聲止儀禮司官跪
奏各執事官行禮贊五拜禮畢贊供事執事官各就位
儀禮司官跪奏請陞殿駕輿中和韶樂奏聖安之曲尚

寶官捧寶前行導駕官前導扇開簾捲尚寶官置寶於
案樂止鳴鞭報時雞唱曉對贊唱排班班齊贊禮唱鞠
躬大樂作贊四拜平身樂止典儀唱進表大樂作給事
中二人詣同文案前導引序班舉案由東門入置殿中
樂止內贊唱宣表目宣表目官跪宣訖俛伏興唱宣表
展表官取表宣表官至簾前外贊唱眾官皆跪宣表訖
內外皆唱俛伏興平身序班即舉表案於殿東外贊唱
眾官皆跪代致詞官跪於丹陛中致詞云具官臣某等
茲遇正旦則云三陽開泰萬物咸新
冬至則云律應黃鍾日當長至恭惟皇帝陛下膺乾納祐奉
天永昌賀訖外贊唱眾官皆俯伏興樂作四拜興平身
樂止傳制官詣御前跪奏傳制俯伏興由東門靠東出
至丹陛之東西向立稱有制贊禮唱跪百官皆跪宣制
正旦則云履端之慶
冬至則云履長之慶與卿等同之贊禮唱俯伏興平身樂止贊

搢笏鞠躬三舞蹈贊跪唱山呼百官拱手加額曰萬歲
唱山呼曰萬歲唱再山呼曰萬萬歲凡呼萬歲樂工軍
校齊聲應之贊出笏俛伏興大樂作贊四拜平身樂止
儀禮司官跪奏禮畢中和樂作奏定安之曲駕興尙寶
官捧寶導駕官前導至華蓋殿樂止引禮官引百官以
次出

菽園雜記本朝將軍之名不一職方司職掌收充將
軍蓋選軍民中之長軀偉貌者以充朝儀耳今謂之
大漢將軍優旃所稱樞楯郎疑卽此也凡大朝會若
蕃使入貢天子御正殿大漢將軍著飾金介冑持金
瓜鐵鉞刀劔列丹陛上常朝著明鐵介冑列門楯間
其次等者御道左右及文武官班後相向握刀布列
凡鑾輿出入扈從以行宿衛巡警之事則以侯伯都

督係國戚者統之其常朝宿衛各以番上謂之正直
有大事無番上謂之貼直正直者金牌相傳懸掛貼
直者尙寶司奏而給發事畢復納之

明史樂志凡大朝賀教坊司設中和韶樂於殿之東西
北向陳大舞於丹陛之東西亦北向駕興中和韶樂奏
聖安之曲陞座進寶樂止百官拜大樂作拜畢樂止進
表大樂作進訖樂止宣表目致賀訖百官俯伏大樂作
拜畢樂止宣制訖百官舞蹈山呼大樂作拜畢樂止駕
興中和韶樂奏定安之曲導駕至華蓋殿樂止百官以
次出其大宴饗教坊司設中和韶樂於殿內設大樂於
殿外列三舞雜隊於殿下駕興大樂作陞座樂止文武
官入列於殿外北向拜大樂作拜畢樂止進御筵樂作
進訖樂止進花樂作進訖樂止進第一爵教坊司奏炎

精開運之曲樂作內外官拜畢樂止散花樂作散訖樂
止第二爵教坊司奏皇風之曲樂止進湯鼓吹饗節前
導至殿外鼓吹止殿上樂作羣臣湯饌成樂止武舞入
教坊司請奏平定天下之舞第三爵教坊司請奏卷皇
明之曲進酒如前儀樂止教坊司請奏撫安四夷之舞
第四爵奏天道傳之曲進酒進湯如前儀樂止奏車書
會同之舞第五爵奏振皇綱之曲進酒如前儀樂止奏
百戲承應第六爵奏金陵之曲進酒進湯如前儀樂止
奏八蠻獻寶承應第七爵奏長楊之曲進酒如前儀樂
止奏採蓮隊子承應第八爵奏芳醴之曲進酒進湯如
前儀樂止奏魚躍於淵承應第九爵奏駕六龍之曲進
酒如前儀樂止收爵進湯進大膳樂作供羣臣飯食訖
樂止百花隊舞承應宴成徹案羣臣出席北向拜樂作

拜畢樂止駕輿大樂作鳴鞭百官以次出

二十六年更定陞殿韶樂奏聖安之曲 乾坤日月

明八方四海慶太平龍樓鳳閣中扇開簾捲帝王輿
聖感天地靈保萬壽洪福增祥光王氣生陞寶位永
康寧

還宮韶樂奏定安之曲 九五飛聖龍千邦萬國敬

依從鳴鞭三下同公卿環珮響玳瑁掌扇護御容中
和樂音呂濃翡翠錦繡擁還華蓋赴龍宮

公卿入門奏治安之曲 忠良爲股肱昊天德承
主恩森羅拱北辰御鑪烟遶奉天門江山社稷興安
天下軍與民龍虎會風雲後不用

二十六年又定殿中韶樂簫十二笙十二排笙四橫笛
十二壎四箎四琴十瑟四編鐘二編磬二應鼓二祝一

五禮通考卷一百一十五
三十一
敬一搏拊二丹陛大樂戲竹二簫十二笙十二笛十二
頭管十二箏八琵琶八二十弦八方響二鼓二拍板八
杖鼓十二

明史禮志二十六年改定皇太子親王朝賀於乾清宮
其日皇帝皇后陞座侍從導引如儀引禮引皇太子及
妃親王及妃詣上位前贊禮贊四拜興贊禮引皇太子
詣前贊跪引禮贊太子妃諸王及妃皆跪皇太子致詞
同前不傳制贊禮贊皇太子俯伏興引禮贊諸王俯伏
興太子妃諸王妃皆興贊禮引皇太子復位贊拜皇太
子以下皆四拜禮畢引禮引至皇后前其前後贊拜皆
如朝皇帝儀致詞稱母后殿下禮畢出七年更定不致
賀辭止行八拜禮朝賀皇太后禮皆同
三十年更定朝賀儀同文玉帛案俱進安殿中宣表訖

舉置於表案之南

大政記惠帝建文元年正月癸酉朔帝謁奉先殿朝皇
太后詣孝陵上香還御殿受朝不作樂

邱氏濬曰我朝祖宗以來每日先於奉先殿行禮東
朝問安然後御朝其於父子之親君臣之義兩盡

明會典永樂六年正旦文皇后喪服皇帝常服御殿錦
衣衛陳鹵簿儀仗於丹陛教坊司陳大樂而不作百官
行禮如洪武例

王圻續通考永樂十二年春正月辛巳朔日食免朝賀
先是鴻臚寺奏習正旦朝儀上召禮部翰林院官問曰
正旦日食百官賀禮可行乎尚書呂震對曰日食與朝
賀之時先後不相妨侍郎儀智曰終是同日免賀為當
楊士奇曰日食天變之大者前代元旦日食多不受朝

宋仁宗時元旦日食富弼請罷宴徹樂呂夷簡不從弼曰萬一契丹行之爲中國羞後有自契丹回者言虜是日罷宴仁宗深悔今免賀誠當上從之

十三年春正月丙子朔日食免朝賀
明史樂志永樂十八年定朝會宴饗樂舞

一奏上萬壽之曲 龍飛定萬方受天命振紀綱彝倫攸敘四海康普天率土盡來王臣民舞蹈嵩呼載揚稱觴奉吾皇聖壽天長

平定天下舞曲 其一四邊靜威伏千邦四夷來賓納表章顯禎祥承乾象皇基永昌萬載山河壯 其二刮地風聖主過堯舜禹湯立五常三綱八蠻進貢朝今上頓首誠惶朝中宰相變理陰陽五穀收成萬民歡暢賀吾皇齊讚揚萬國來降

二奏仰天恩之曲 皇天眷聖明五辰順四海甯風調雨順百穀登臣民鼓舞樂太平賢良在位邦家永禎吾皇仰洪恩夙夜存誠

黃童白叟鼓腹謳歌承應曲曰豆葉黃 雨順風調五穀收成倉廩豐盈大利民生託賴著皇恩四海清鼓腹謳歌白叟黃童共樂咸甯

四夷舞曲 其一小將軍順天心聖德成化番邦盡朝京四夷歸伏舞於龍廷貢皇明寶貝擎 其二殿前歡四夷率土歸王命都來仰大明萬邦千國皆歸

正現帝庭朝仁聖天階班列眾公卿齊聲歌太平 其三慶豐年和氣增鸞鳳鳴紫霧生祥雲朝霞映熱金鑪香味馨列丹墀御駕盈絃管簫韶五音應龍笛

閒鳳笙 其四渤海令金盃中酒滿盛御案前列羣

英君德成皇圖慶嵩呼萬歲聲 其五過門子聖主
興聖主興顯威靈蠻夷靜至仁至德至聖明萬萬年
帝業成

三奏感地德之曲 皇心感地靈順天時德厚生含
宏光大品物亨鍾奇毓秀產俊英河清海晏麟來鳳
鳴陰陽永和平相我文明

車書會同舞曲 其一新水令錦衣花帽設丹墀俱
公服百司同會麟至舞鳳來儀文武班齊朝賀聖明
帝 其二水仙子八方四面錦華夷天下蒼生仰聖
德風調雨順昇平世徧乾坤皆讚禮託君恩民樂雍
熙萬萬年皇基堅固萬萬載江山定體萬萬歲洪福
天齊

四奏民樂生之曲 世開約萬民荷天地感聖恩乾

坤定位四海春君臣父子正大倫皇風浩蕩人心載
醇熙熙樂天真永戴明君

表正萬邦舞曲 其一慶太平奸邪濁亂朝綱搆禍
難煽動戈折赫怒吾皇親征灞上指天戈敵皆降
其二武士歡白溝戰場旌旗雲合迷日光令嚴氣張
三軍踴躍齊奮揚埽除殘甲如風蕩凱歌傳四方仁
聖不殺降望河南失機槍 其三滾繡毬肆旅拒恃
力強一心構殃築滄洲百尺城隍騁虜毒恣虎狼孰
能禦當順天心有德隆昌倒戈斂甲齊歸降撫將生
還達故鄉自此仁聞愈彰 其四陣陣羸不數孫吳
兵法良神謀睿算合陰陽八陣堂堂行天上虎略龍
韜孰敢當俘囚十萬皆疏放感荷仁恩戴上蒼 其
五得勝回兩傍四方展鳥翼風雲雁行出奇兵敵難

量士強馬強徧百里眠旌臥鎗勝兵回樂洋洋其
六小梁州敵兵戰敗神魂喪擁貔貅直渡長江開市
門肆不移宣聖恩如天曠綸音頒降普天下仰吾皇
五奏感皇恩之曲 當今四海甯頌聲作禮樂興君
臣慶會躋太平衣冠濟濟宴彤庭文臣武將共荷恩
榮忠心盡微誠仰答皇明
天命有德舞曲 其一慶宣和雨順風調萬物熙一
統華夷四野嘉禾感和氣一榦百穗一榦百穗其
二窄輒兒梯航萬國來丹陛太平年永固洪基正東
西南北來朝會洽寰宇布春暉四夷咸賓聲教美自
古明王在慎德不須威武服戎狄祥瑞集鳳來儀佳
期萬萬歲聖明君主華夷
六奏慶豐年之曲 萬方仰聖君大一統撫萬民豐

年時序兩均穰穰五穀貨財殷酣歌擊壤風清俗
淳四夷悉賓正統皇仁
七奏集禎之曲 皇天眷大明五星聚兆太平騶
虞出現甘露零野蠶成繭嘉禾生醴泉湧地河水清
乾坤萬萬年四海永甯
八奏永皇圖之曲 天心眷聖皇正天位撫萬邦仁
風宣布禮樂張戎夷稽首朝明堂皇圖鞏固賢臣贊
襄太平日月光地久天長
九奏樂太平之曲 皇恩被八紘三光明四海清人
康物阜歲屢登含哺鼓腹皆歡聲民歌帝力唐堯至
仁乾坤永清共樂太平
導膳迎膳進膳及陞座還宮百官行禮諸曲俱與洪
武間同

王圻續通考仁宗洪熙元年春正月壬申朔上御奉天
殿朝羣臣命禮部鴻臚寺不作樂羣臣止行五拜三叩
頭禮先是禮部尚書呂震請於上曰陛下初登大寶天
下文武之臣及海外諸國皆來朝宜受賀作樂如大朝
之儀不從次日震固請大學士楊士奇楊榮金幼孜黃
淮進曰陛下言是上曰山陵甫畢事忍遽即吉朕明日
亦不欲出震曰四方萬國之人遠朝新主皆欲一覩天
顏固聖孝誠至亦宜勉順下情上顧士奇四人曰禮過
矣對曰誠如聖諭必欲俯順輿情亦不宜備禮上從之
故有是命

明會典宣宗宣德四年令在外大小衙門遇正旦等節
慶賀禮俱照洪武初舞蹈山呼行十四拜禮

王圻續通考正統十一年正月己巳朔立春禮部言二

節同日宜殺立春禮從之舊制立春順天府官四拜進
春後復四拜文武百官行五拜三叩頭賀禮至是定順
天府官四拜進春後百官即入賀行正旦禮後憲宗成
化元年亦正旦立春同日改致詞云茲遇紀元成化正
旦逢春氣節會同天人交泰云云其慶賀進春禮亦並
舉焉

景泰元年正月丁丑朔帝祭奉先殿朝上聖皇太后及
皇太后出御奉天殿百官行五拜三叩頭禮時以上皇在
迤北免賀

成化十四年十一月戊午朔始令翰林官習儀
王鏊震澤長語國家正旦冬至聖節凡大朝會先期
百官皆赴朝天宮習儀或靈濟宮唯翰林獨否相傳
宣廟一日召翰林不至上問故左右對以往習儀所
上曰翰林終日侍朕側尚何習為恐其倒拜邪自是

不復習相傳以為故事成化中中官汪直用事多使
邏人訶察諸司不法是日學士王獻檢討張泰方在
途投謁邏人執之以故事對詔問內閣時萬安劉珏
劉吉不能執奏乃云有故事而考諸故典不見獻泰
雖免罪而翰林不習儀之典遂廢惟內閣與東西兩
房至今不習蓋宣廟之命史官失於紀載故也

明孝宗實錄宏治元年正月丙申朔帝詣奉先殿太皇
太后皇太后宮行禮畢出御奉天殿文武羣臣公服行
五拜三叩頭禮是年冬至及二年正旦皆
然二年冬至始行賀禮

天政記正德二年正月乙亥朔日有食之帝不御殿免
賀視朝如常儀

王圻續通考正德十一年正月癸未朔羣臣待漏入賀
日哺禮始成及散朝已昏夜眾奔趨而出顛仆相踐踏

有將軍趙朗者死於禁門御史程啟具奏其狀請帝
味爽視朝以圖明作之治不報

十四年十二月至南京詔百官戎服朝明年正旦南京
兵部尚書喬宇禮部侍郎楊廉不可率諸臣朝服賀

蕙田案正德十三年正旦帝在宣府十四年
正旦在太原十五年正旦在南京百官俱朝

服於奉天門外行遙賀禮

明會典嘉靖七年奏準凡遇萬壽聖節正旦冬至大朝
賀先令承天門端門及左右闕門守門內外官員嚴禁
雜人行走鼓初嚴執事官并侍衛官軍先入次皇親公
侯駙馬伯次在京文武品官次來朝品官次內外雜職
次生儒次外國四夷人至奉天殿下文武百官依品級
序立毋得攙越亂班禮畢外國四夷先出次生儒次雜

職次文武品官次侍衛官軍及儀從人等俱盡象馬方
行其金水橋東西角門各添設序班凡有攬越者御史
序班糾舉拏奏若有市井奸人假借儒吏衣巾冒入殿
庭錦衣衛官校緝拏又令凡正旦冬至聖節百官俱於
先期之三日及二日習儀正旦冬至至於朝天宮聖節於
靈濟宮

大政記十四年正月壬戌朔免朝賀癸酉御奉天殿文
武及朝覲官行禮

明世宗實錄時帝以憲廟恭妃初喪不受節賀禮部請
於視朝之日令文武百官及天下朝覲官公服行五拜
三叩頭禮一伸臣子之情詔以十二日行

明會典正旦冬至百官朝賀儀嘉靖十六年更定前一
日尚寶司設寶案於奉天殿寶座之東鴻臚寺設表案

一於殿東中門外禮部主客司設蕃國貢方物案八於
丹陛中道左右欽天監設定時鼓於文樓之上教坊司
設中和韶樂於奉天殿內東西設大樂於奉天門內東
西俱北向至期錦衣衛陳鹵簿儀仗於丹陛及丹墀東
西設明扇於殿內東西陳車輅步輦於奉天門丹墀中
道北向金吾等衛列甲士軍仗於午門外奉天門外及
丹墀東西旗手衛設金鼓於午門外列旗幟於奉天門
外御馬監設仗馬錦衣衛設馴象於文武樓南東西相
向欽天監設報時位於丹陛之東鼓初嚴百官具朝服
齊班於午門外鼓次嚴引班官引百官并進表人員及
四夷人等次第由左右掖門入詣丹墀序立欽天監雞
唱官司晨一員於文樓下西向錦衣衛將軍六員於殿
內之南北向將軍四員於丹陛四隅東西相向其餘侍

衛將軍各分立於殿陛等處如儀鳴鞭四人於丹墀中
道左右北向金吾等衛護衛官二十四員於丹陛之南
六員於丹墀之北俱東西相向陳設方物鴻臚寺司賓
署丞一員徹方物案鴻臚寺序班十六員於丹陛中道
左右外贊鴻臚寺鳴贊等官十二員於丹陛及丹墀東
西糾儀御史十二員於丹墀之東西殿前侍班錦衣衛
千戶六員光祿寺署官四員序班二員傳呼鳴鞭錦衣
衛百戶四員俱於殿中門外東西相向導表六科都給
事中二員序班二員於表案左右掌領侍衛官三員於
殿內東西相向錦衣衛正直指揮一員於簾右東向百
戶二員於簾下左右相向捲簾畢即趨出殿門外各預
立以俟鼓三嚴執事禮部堂上官并內贊鳴贊一員陳
設表案并舉案序班五員典儀鴻臚寺司儀署丞一員

捧表禮部儀制司官四員展表六部都察院通政司大
理寺堂上官二員宣表致詞并傳制等項鴻臚寺堂上
官五員捧寶尚寶司官二員導駕六科給事中十員殿
內侍班翰林院官四員中書官四員糾儀御史四員序
班二員及各遣祭官俱詣華蓋殿外候上具袞冕陞座
鐘聲止入序立遣祭官以次復命訖各趨入丹墀班禮
部堂上官跪奏方物并請上位看馬候得旨復位鴻臚
寺卿跪奏執事官行禮贊五拜叩頭畢贊各供事鴻臚
寺卿跪請陞殿駕輿導駕官前導尚寶官捧寶前行中
和樂作奏聖安之曲上御奉天殿陞座導駕官立於殿
內柱下東西相向侍班翰林官立於東導駕官之後中
書官立於西導駕官之後糾儀御史序班分立於侍班
官之下尚寶官置寶於案分立於導駕官之上樂止鳴

鞭報時雞唱訖外贊唱排班班齊鞠躬大樂作四拜興
平身樂止內贊贊進表大樂作導表官導表案至殿東
中門止序班舉案入置殿中退立於東西柱下樂止贊
宣表目禮部堂上官并宣表目官詣殿中跪宣畢各叩
頭退贊宣表展表官取表同宣表官詣殿中跪外贊贊
跪眾官皆跪宣畢展表官分東西先退內外皆贊俯伏
大樂作興平身樂止宣表官退序班舉案置殿東外贊
贊跪眾官皆跪代致詞官跪於丹陛中道致詞云公侯
駙馬伯文武百官某官某官某官等詞與洪武間所定同賀訖外贊贊俯
伏眾官皆俯伏大樂作四拜興平身樂止傳制官詣御
前跪奏傳制俯伏興由東門靠東出至丹陛之東西向
立稱有制外贊贊跪眾官皆跪宣制制與洪武間所定同宣訖外贊
贊俯伏大樂作興平身樂止贊摺笏鞠躬三舞蹈贊跪

唱山呼百官拱手加額曰萬歲唱山呼曰萬歲唱再山
呼曰萬萬歲贊出笏俯伏大樂作四拜興平身樂止鴻
臚卿詣御前跪奏禮畢鳴鞭中和樂作奏定安之曲駕
興尚寶官捧寶導駕官前導至華蓋殿樂止引班官引
百官人等以次出序班徹方物案所司設黃幄於丹陛
上陳王府及勳臣總兵官外夷所進馬匹於丹墀內禮
部并鴻臚寺官立於丹墀東候上易便服御黃幄甲士
行禮畢禮部官詣御道中跪奏御馬過奏畢復位候馬
過詣御道中跪奏馬過畢駕還宮
明世宗實錄十六年三月戊戌南京禮部尚書崔韜言
元旦冬至萬壽臣下慶賀皆行十二拜禮惟南京行八
拜禮不宜獨簡下禮部議以大節在京有宣表致詞及
傳制俱舞蹈山呼行十二拜禮而南京在外皆無是以

南京每遇三大節先期進表俱舞蹈山呼行二拜禮遵送郊外至日止八拜此祖宗舊制非臣下敢自爲隆殺詔仍舊

明會典凡進賀表目親王各一通各處掛印總兵官各一通朝鮮國王一通南京禮部等衙門一通浙江等布政司按察司直隸府州等衙門各一通南京中軍等都督府一通中都留守司浙江等都司直隸衛所等衙門各一通

春明夢餘錄大朝畢上暫退至謹身殿更便服於殿外丹陛上設幄羣臣盛服侍班御馬監之馬雲錦成羣每一馬各有名牒壯士控之由東過西最爲盛觀其制始於嘉靖中至後久不舉行崇禎壬申年五十一月初十日冬至郊祀十一日百官入賀朝畢復一閱

視是日閱馬二百三十三匹

明世宗實錄十八年正月庚午朔帝御奉天殿羣臣具公服致詞行八拜禮時帝母章聖皇太后之喪於十二月三十日服制二十七日滿禮部言檢孝貞皇太后故事制滿後素服御西角門視朝山陵畢後變服第此次適遇正旦朝會祭享一應吉儀宜酌議今擬皇上正旦淺色袍黑冠帶御殿受朝疏入未下會帝問大學士夏言元旦元極殿拜天仍具祭服先期一日合變服否於是禮部更請正旦拜天受朝及先期一日時享宗廟前三日俱服青服帝謂內閣曰既曰以日易月雖山陵未就實非古人未葬百事皆輟之義定服後不必遷就有事於郊宜吉服作樂有事於廟著淺色服不作樂卿等其與宗伯翰林禮科議否卽曰否於是羣臣請遵諭行

報可初禮部三請正旦朝賀俱詔免及上制滿儀注內具正旦視朝一節又別具疏請帝仍於是日御殿視朝帝乃報曰履端歲首朝會之始但昨方除服梓宮在上卿等固以禮請且朕亦謂當行實事其於奉天門百官青衣本等帶行五拜三叩頭禮不必公服致詞鐘鼓鳴鞭俱輟之禮部復固請帝具翼善冠黃袍御殿百官公服致詞鳴鐘鼓鳴鞭奏堂下樂帝曰改歲更始王者奉順天道不可不重有謂弗宜非知道者既在除服外其如議行

十九年正月甲午朔帝疾不御朝百官詣左順門疏起居報聞

二十年正月戊午朔帝疾不御殿百官公服於奉天門外朝覲官四夷使於午門外行五拜禮文武大臣侍從官各表賀丙申帝拜天於元極殿出御奉天殿百官公服行八拜禮帝諭禮部元極之拜可移於九日取陽九之數庶猶躬奉愈於攝行尙書嚴嵩因言新正免賀臣子之心未安元極殿拜畢請具翼善冠黃袍出御殿行禮帝曰卿等言是新歲上下豈可不一接見乎

明會典嘉靖二十一年令聖節正旦冬至俱赴朝天宮習儀凡正旦節自十二月二十八日起至正月二十日止百官俱吉服通政司不奏事冬至前三日後三日聖節前三日後三日俱吉服通政司亦不奏事凡朝賀班首致詞官例用勳臣有缺則禮部題請欽定

王圻續通考二十二年正月丙午朔日有食之帝御朝免賀

明世宗實錄自是年以後終帝之世惟二十五年正旦

一受朝賀其餘正旦冬至俱不御殿百官朝服於奉天門行五拜三叩頭禮歲以爲常

王圻續通考三十二年正月戊寅朔日有食之時陰雲不見頃之大雪百官以救護罷朝次日始朝服詣奉天門行禮表賀

天政記穆宗隆慶元年正月丁巳朔免朝賀封奏如常儀通政司言舊例自正旦至二十日以節假免奏事封本茲值皇上御門聽政勵精萬幾之始請封奏如常從之丁卯賜百官上元節假十日諸司仍奏事自是歲以爲常

神宗實錄萬曆四年十一月甲辰定京營官大朝班次是時從總督戎政楊炳之請令京營參遊佐擊坐營等官遇聖節冬至元旦俱於副將後隨班朝賀中都山東

河南三都司各領班都司隨佐擊後

右明正旦朝賀

五禮通考卷第一百二十九

五禮通考卷第一百四十

內廷供奉禮部右侍郎金匱秦惠田編輯

李太保總督隸都觀承同訂

嘉禮十三

朝禮

兩淮都轉運使德慶盧見曾

直隸按察司副使元和宋宗元

參校

宋書禮志漢以高帝十月定秦且為歲首至武帝雖改用夏正然朔猶常饗會如元正之儀魏晉則冬至日受萬國及百寮稱賀因小會其儀亞於歲旦晉有其注

晉書樂志冬至初歲小會歌
日月不留四氣回周節慶代序萬國同休庶允羣后
奉壽升朝我有壽禮式宴百寮繁肴綺錯旨酒泉淳
笙鏞和奏磬管流聲上隆其愛下盡其心宣其壅滯
訓之德音乃宣乃訓配享交泰永載仁風長撫無外

邱氏濬曰案此後世冬至行朝賀禮之始蔡邕獨斷曰冬至陽氣起君道長故賀夏至陰氣起君道衰故不賀宋人於五月朔亦賀非是

蕙田案冬至朝賀於古無聞至魏晉始有之據晉宋禮志則是因漢有十月享會始移之冬至而漢儀無之也然蔡邕獨斷已有冬至陽氣起君道長故賀之說則似後漢先有之矣

宋書禮志宋永初元年八月詔曰慶冬使或遣不役宜省今可悉停惟元正大慶不得廢耳郡縣遣冬使詣州及都督府者亦宜同停

冊府元龜後魏孝文太和十五年十一月丙戌初罷小歲賀小歲謂冬至

蕙田案隋禮儀志後齊天保元年皇太子監國在西林園冬會二年於北城第內冬會則後齊亦有冬會之禮而儀注未聞

隋書禮儀志隋制正旦及冬至文物充庭

蕙田案隋志全文已見正旦朝賀門不重載唐六典凡冬至大陳設如元正之儀其異者皇帝服通天冠無諸州表奏祥瑞貢獻

冊府元龜開元八年十一月中書門下奏曰伏以冬至一陽初生萬物潛動所以自古聖帝明王皆於此日朝萬國視雲物禮之大者莫逾是時其日亦祀圜丘皆令攝官行事質明既畢日出視朝國家以來更無改易緣新格將其日祀圜丘遂改用小冬至日受朝若親拜南郊受朝須改既令攝祭禮不可移伏請改正從之因勅

自今冬至日受朝永為常式

十六年十一月乙巳日南至御含元殿受朝賀如常儀
唐開元禮皇帝皇后正至受皇太子朝賀 皇帝皇后
正至受皇太子如朝賀 皇帝正至受羣臣朝賀

蕙田案開元禮於開元二十年頒行其儀注
全文已見正旦朝賀門惟冬至賀詞稱天正
長至伏惟陛下如日之升宣制稱履長之慶
皇帝受朝服通天冠絳紗袍不奏祥瑞貢物
無諸方表為不同耳今不重載

冊府元龜二十二年閏十一月壬午朔日有食之是日
長至停朝癸未御應天樓受朝賀

文獻通考天寶三載十一月五日甲子冬至勅伏以昊
天上帝義在尊嚴恭惟祀典每用冬至既於是日有事

園丘更受朝賀實深兢惕自今以後冬至宜取以次日
受朝仍永為常式

蕙田案冬至既祀園丘復受朝賀煩勞非體
攝而行事尤非敬天之義不如以次日受朝
為便

冊府元龜天寶十載十一月丙午冬至御觀風樓受朝
賀

肅宗乾元元年建子月戊戌冬至受朝賀禮畢朝聖皇
於西宮 二年十一月丁亥冬至帝朝聖皇於興慶宮
翌日受朝於含元殿

代宗廣德二年十一月甲寅是日長至御含元殿受朝
賀

永泰元年十一月己未長至御含元殿受朝賀仗衛如

常儀 二年十一月甲子長至含元殿下制大赦改元
大曆宣制畢乃受朝賀

大曆二年十一月己巳長至御含元殿受朝賀仗衛如
常儀 三年十一月甲戌長至御含元殿受朝賀仗衛
如常儀 八年閏十一月壬寅朔冬至御含元殿受朝
賀仗衛如常儀 九年十一月甲戌長至御含元殿受
朝賀仗衛如常儀 十年十一月丙午長至詔停賀邇
梁王葬期也 十一年十一月丁巳冬至御含元殿受
朝賀仗衛如常儀 十三年十一月丁卯長至命有司
祀昊天上帝於南郊不視朝戊辰上御含元殿朝賀仗
衛如常儀
德宗建中元年十一月丁丑日南至戊寅御含元殿受
朝賀

文獻通考建中二年十一月二十日勅宜以冬至日受
朝賀

冊府元龜貞元七年十一月丁亥日南至不視朝 十
一年十一月丙辰日南至不受朝賀 十五年十一月
罷冬至朝賀以興兵討蔡州吳少誠也 十六年十一
月罷冬至朝賀以襄王第五男薨廢朝

憲宗元和三年十一月甲申日南至權停朝賀 六年
十一月乙巳勅令今年冬至朝賀宜權停 八年十一
月庚戌朔勅權停冬至朝賀

穆宗長慶元年十一月丁酉以討鎮州權停今年冬至
朝賀

文宗太和八年十一月庚申日南至宰臣率百寮等奉
賀如常儀

後唐莊宗同光元年十一月丁未日長至帝不受朝賀
百官詣東上閣門拜表稱慶議者以爲長至元會歲中
之大朝斯爲盛禮著於令式是日合陳樂懸排紉仗一
人當陽昭國容也兵興以來而斯禮或闕帝初一函夏
不復唐典無故輟禮議者惜之

明宗天成元年十一月癸亥日南至帝御文明殿百寮
稱賀 二年十一月戊辰日南至百官詣閣門拜表稱
賀 三年十月壬戌中書奏案貞元四年中書侍郎李
泌奏冬至日受朝賀請準元日從之十一月癸酉冬至
帝御崇元殿受朝賀仗衛如式 四年十一月己卯日
長至帝御文明殿受朝賀樂懸仗衛如常儀

長興元年十一月庚申日長至帝御文明殿受朝賀樂
懸仗衛如常儀 二年十一月己丑日長至帝御文明

殿百寮稱賀 三年十一月甲子日長至帝御文明殿
百寮稱賀

末帝清泰元年十月庚子太常言冬至不視朝百寮表
賀是日太府設表案席褥禮部進表至閣門班首一員
跪奉表授閣門使羣臣俱拜舞蹈訖表入久之閣門使
出宣曰履長之慶與卿等同之羣臣復拜舞訖而退
晉高祖天福三年十一月丙寅冬至帝御崇元殿受朝
賀 五年十一月冬至帝受朝於崇元殿王公上壽列
二舞於樂懸之北舉觴奏元同之樂三爵奏文同之樂
帝舉食文武歌昭德之舞又歌成功之舞上舉四爵登
歌作羣臣飲懸下樂作又奏龜茲樂一部以俟食畢
周太祖廣順二年十一月己卯日南至帝御崇元殿羣
臣服朝服稱賀退班於永福殿庭上壽賜羣臣酒三爵

而罷 三年十一月乙酉日南至帝不受朝賀羣臣閣門拜表班退賜茶酒

世宗顯德元年十一月庚寅日南至帝不御殿文武百寮詣閣拜表稱賀 三年十一月庚子日南至帝不御殿以宣懿皇后之喪在近故也宰臣率百官詣閣門拜表稱賀 五年十一月辛亥日南至帝御崇元殿受朝賀金吾仗衛太常樂懸如儀禮畢宰臣率百寮常服詣永德殿上壽而退

宋史禮志宋承前代之制以元日五月朔冬至行大朝會之禮

文獻通考太祖建隆元年十一月冬至上親征揚州不受朝宰臣率百官詣行宮拜表稱賀

乾德三年冬至受朝賀於文明殿帝服通天冠絳紗袍

設宮懸仗衛如元會

四年冬至朝元殿受朝畢常服

御大明殿羣臣上壽始用雅樂登歌二舞羣臣酒五行而罷每行酒太官令奏巡周饋食稱食徧

宋史太宗本紀太平興國二年十一月庚寅日南至帝始受朝

樂志太平興國二年冬至上壽復用教坊樂

真宗本紀咸平三年十一月辛卯日南至御朝元殿受朝

景德四年十一月戊辰日南至御朝元殿受朝

仁宗本紀天聖七年十一月癸亥冬至率百官上皇太后壽於會慶殿遂御天安殿受朝

明道元年冬十一月己卯冬至率百官賀皇太后於文德殿御天安殿受朝

禮志神宗元豐元年龍圖閣直學士史館修撰宋敏求
上朝會儀二篇令式四十篇詔頒行之

蕙田案元正冬至大朝會儀注一篇已載正
旦朝賀門其異於元正者惟不設貢物給事
中位祥瑞案臣僚致詞則云晷運推移日南
長至宣答則云履長之慶耳

又案文獻通考太祖乾德三年四年五年開
寶二年三年太宗太平興國二年端拱元年
淳化四年真宗咸平三年景德四年大中祥
符八年仁宗天聖七年明道元年神宗熙寧
二年徽宗政和二年竝冬會終汴京冬至朝
賀之禮凡十五舉而已

陳隨隱上壽拜舞記凡冬至朝賀一十三拜一舞蹈

初百官面西立儀仗以下起居如閣次之次讀奏自
舍人宣班首以下起居稱賀北面躬身聽贊拜兩拜
起舞蹈如初起躬身俟班首奏聖躬萬福聽贊拜兩
拜起直身立俟樞密升殿班首致詞宣答如正旦禮
王圻續通考理宗寶慶二年十一月日南至御大慶殿
受朝

端平二年十一月日南至羣臣朝賀

遼史禮志冬至朝賀儀臣僚齊班如正旦儀皇帝皇后
拜日臣僚陪位再拜皇帝皇后升殿坐契丹舍人通臣
僚入合班親王祝壽宣答皆如正旦之儀謝訖舞蹈五
拜鞠躬出班奏聖躬萬福復位再拜鞠躬班首出班俛
伏跪祝壽訖伏興舞蹈五拜鞠躬贊各祇候分班不出
合班御牀入再拜鞠躬贊進酒臣僚平身引親王左階

上殿就欄內褥位搢笏執臺琖進酒皇帝皇后受琖訖退就褥位置臺琖出笏俛伏跪少前自通全銜臣某等謹進千萬歲壽酒俛伏興退復褥位再拜鞠躬殿下臣僚皆再拜鞠躬宣答如正旦儀親王搢笏執臺琖分班皇帝皇后飲酒奏樂殿上下臣僚皆拜稱萬歲壽樂止教坊再拜臣僚合班親王進受琖至褥位置臺琖出笏引左階下殿御牀出親王復丹墀位再拜鞠躬贊祇候分班引出班首右階上殿奏表目進奉諸道進奉教坊進奉過訖贊進奉收班首舞蹈五拜鞠躬贊各祇候班首出臣僚復入合班謝舞蹈五拜鞠躬贊各祇候分班引出聲警皇帝皇后起赴北殿皇太后於御容殿與皇帝皇后率臣僚再拜皇太后上香皆再拜贊各祇候可矮墩以上上殿皇太后三進御容酒陪位皆拜皇太后

升殿坐皇帝就露臺上褥位親王押北南臣僚班丹墀內立皇帝再拜臣僚皆拜鞠躬皇帝欄內跪祝皇太后壽訖復位再拜凡拜皆稱萬歲贊各祇候臣僚不出皇帝皇后側坐親王進酒臣僚陪拜皇太后宣答皆如正旦之儀臣僚分班不出班首右階上殿奏表目合班謝宣宴上殿就位如儀御牀入皇帝進皇太后酒如初各就坐行酒宣飲盡如皇太后生辰之儀皇后進酒如皇帝之儀三進酒行茶教坊致語行殺饌大饌七進酒曲破臣僚起御牀出謝宴皆如皇太后生辰儀

蕙田案遼冬至朝賀儀畧同正旦惟帝后並升殿坐與正旦異元朝賀禮蓋本於此

太宗本紀會同四年冬十一月壬午以冬至受賀著令穆宗本紀應歷十八年十一月癸卯冬至被酒不受賀

道宗本紀清寧元年冬十一月戊寅冬至有事於太祖
景宗與宗廟不受羣臣賀

蕙田案金史禮志無冬至受朝賀之禮惟章宗本紀承安元年十一月戊戌有事於南郊大赦改元己亥曹王永升率親王百官賀然此以南郊禮成受賀非冬至受賀也冬會之禮終金之世竟未之行也
又案元史禮志亦無賀冬之禮惟元正天壽受賀而已徧檢諸帝紀亦無之則元亦未行冬會之禮也

明太祖實錄洪武元年定冬至朝會儀

蕙田案冬至朝賀儀注與正旦同其致詞則云律應黃鐘日當長至宣制則云履長之慶

郭正域典禮志五年八月命罷天下進賀冬至表箋

太祖實錄十二年十一月癸丑冬至以孝慈皇后喪帝常服御奉天殿百官常服行五拜禮

二十六年六月壬寅命禮官重定正旦冬

至朝會儀

詳見正旦朝賀門

永樂二十二年十一月庚寅禮部尙書呂震奏冬至節

請御正殿受賀帝以山陵未終不許

時仁宗已即位

天順五年十一月丁未以冬至萬壽節同日改致詞宣表等儀

明會典弘治十七年奏準今後天下都布按三司慶賀表箋除萬壽聖節照例差委堂上官齋進外其餘冬至等節如果堂上官差占照例於本司首領官及所屬府縣衛所佐貳官員內差委不許濫差雜職官員齋進

孝宗實錄弘治十七年十一月癸巳冬至御奉天門百官致詞行禮

以太皇太后喪

武宗實錄正德十二年十一月辛丑冬至帝在宣府羣

臣朝服於奉天門行遙賀禮十四年十一月冬至帝

在清江浦受賀於太監張陽第

明會典冬至大祀禮成儀嘉靖七年定上大祀慶成駕

還百官具朝服於承天門外橋南立迎駕隨至奉天殿

丹墀內侍立執事官先至華蓋殿前東西拱立候上御

華蓋殿具袞冕服陞座鴻臚寺堂上官跪奏執事官行

禮鳴贊贊入班鞠躬五拜叩頭興平身各供事鴻臚寺

堂上官跪奏請陞殿教坊司樂作上御奉天殿陞座樂

止錦衣衛官傳鳴鞭鴻臚寺堂上官傳排班鳴贊贊排

班班齊鞠躬四拜興平身贊跪鴻臚寺堂上官於丹陛

中道跪致詞曰公侯駙馬伯文武百官某官臣某等恭

惟園丘大報載成禮當慶賀致詞畢由殿東門入殿內

侍立鳴贊贊俯伏興鞠躬樂作四拜興平身樂止鴻臚

寺堂上官於殿內跪奏禮畢傳贊禮畢錦衣官傳鳴鞭

上還宮百官退

嘉靖九年分祀二郊以冬至大報是日行慶成禮次日

行冬至朝賀禮畢舉慶成宴本年再定次日日上詣內殿

行節祭禮又詣母后前行賀禮畢始御奉天殿受賀

蕙田案慶成禮始於洪武十二年以後蓋孟

春元日合祀天地於南郊還御正朝受賀也

世宗追復洪武初年之制分祀天地則唯冬

至行郊天禮而元日無之故慶成禮專行於

冬至考世宗分祀之詔起於九年二月是此

條會典所載屬九年者甚是而前條云冬至大祀禮成儀嘉靖七年定則誤矣七年歲首尚有大祀而不在冬至若指歲首大祀言則自洪武十二年以來未之有改不待嘉靖七年始定矣

世宗實錄十四年十一月乙亥冬至次日帝御奉天殿羣臣公服行慶賀禮王府邊鎮四夷所進表文方物皆免陳設宣奏

續文獻通考十六年更定正旦冬至禮

詳見正旦門

大政記十七年十月辛酉定冬至日大祀次日廟享行慶賀禮每歲冬至節帝祀園丘還御殿百官行慶成禮即日百官仍賀冬至賜慶成宴是年十一月二十一日冬至禮官遵奉定儀預請習儀帝已俞之矣尋諭內閣朕連日復思慶賀事宜有失次第心甚不安卿等可卽會禮官令二十一日朕回謁祖考畢依原擬受大祀慶成賀不宜同日並受至日之賀二十二日清晨朕於內殿行祭禮畢出受至日賀回宮俟設宴畢停當行大宴禮自是以後遂爲定制云

蕙田案冬至行慶成禮次日行冬至朝賀會典及郭正域典禮志及明史禮志皆然今考實錄於九年冬至日止言羣臣行慶成禮不言次日朝賀而十二年之以疾免賀十三年之行慶賀禮十四年之公服行禮則皆在冬至之次日蓋十七年以前已有次日慶賀之事而十五年則云冬至日免百官慶賀十六年則云冬至日以足疾免朝賀其云冬至日

者猶言冬至節耳非定指本日而言蓋記者
行文之畧耳非前後不同也至十七年之詔
因以前次日行禮固未著之爲令至是年而
始定歟

明世宗實錄二十五年十一月壬申禮部請冬至仍於
奉天門行禮尙書費寀言積雪初霽天氣凝寒冬至朝
賀恐煩聖躬請如昨歲例臣等朝服於奉天門行禮少
伸臣子拜祝之忱帝以其言爲忠敬報可

右冬至朝賀

蕙田案古者有上壽之辭無賀生辰之禮詩
稱躋彼公堂稱彼兕觥萬壽無疆又云虎拜
稽首天子萬壽人臣受恩於君無以報稱惟
有祝君壽考而已至生日之說自古無之惟

隋高祖仁壽二年詔六月十三日是朕生日
宜令海內爲武元皇帝元明皇后斷屠唐太
宗亦以生日幸慶善宮賦詩賜宴是帝皇稱
生日之始然未置酒稱賀至元宗因源乾曜
張說之請以生日爲千秋節御花萼樓受賀
然御花萼樓則尙非正衙也且終唐之世惟
穆宗文宗復行之其餘諸帝率集沙門道士
講論祈福不稱賀也五代晉漢周亦舉上壽
故事宋世聖節上壽或在紫宸殿或在垂拱
殿或在崇德殿較之正冬御乾元殿其禮猶
殺也金史以元日聖誕上壽并爲一儀則與
元正禮等元明以來蓋承用之唐宋遼金每
一帝必別立節名元則稱天壽節或云聖誕

節明則惟稱萬壽節焉

冊府元龜唐元宗以垂拱元年八月五日生於東都開元十七年八月癸亥以降誕之日大置酒張樂宴百寮於花萼樓下終宴尚書左丞相源乾曜右丞相張說率文武百官等上表曰臣聞聖人出則日月記其初王澤深則風俗傳其後故少昊著流虹之感商湯本元鳥之命孟夏有佛生之供仲春修道祖之籙追始樂原其義一也伏惟開元神武皇帝陛下二氣合神九龍浴聖清明總於玉露爽朗冠於金天月惟仲秋日在端午常星不見之辰祥光照室之期羣臣相賀曰誕聖之辰也焉可不以爲嘉節乎比夫曲水禊亭重陽射圃五日綵線七夕粉筵豈同年而語也臣等不勝大願請以八月五日爲千秋節著之甲令播於天下咸令宴樂休假三日

羣臣以是日獻甘露醇酎上萬歲壽酒王公戚里進金鏡綬帶士庶以絲結承露囊更相遺問村社作壽酒宴樂名爲賽白帝報田神上明元天光啟大聖下彰皇化垂裕無窮異域占風同見美俗帝手詔報曰凡是節日或以天氣推移或因人事表記八月五日當朕生辰感先聖之慶靈荷皇天之眷命卿等請爲令節上獻嘉名勝地良游清秋高興百穀方熟萬寶以成自我作古舉無越禮朝野同歡是爲美事依卿來請宣付所司

王氏欽若等曰誕聖節名始於此

舊唐書元宗本紀開元十八年秋八月丁亥上御花萼樓以千秋節百官獻賀

唐六典凡千秋節皇帝御樓設九部之樂百官袴褶陪位上公稱觴獻壽

開元禮皇帝千秋節受羣臣朝賀并前三日所司供備
如式前一日尚舍鋪御座內外張設竝如常御樓之儀
尚舍光祿供辦如式尚舍先置壽罇於樓上御座之東
又置壽罇於樓前之東南其日平曉陳引仗衛如常
儀百官常服咸就橫街南依東西班序立侍中版奏外
辦皇帝常服御座候褰簾通事舍人引羣官詣橫街北
壽罇之南俱北面中書門下及供奉官如常式立定典
儀贊再拜橫街南北百官俱再拜訖尚食奉御酌壽酒
以授殿中監殿中監以授侍中侍中執酒以立殿中監
受侍中之酒侍中執笏稍前跪奏稱千秋令節臣等不
勝大慶謹上千萬歲壽奏訖興再拜羣臣上下皆再拜
內所司酌壽罇之酒以進皇帝受酒承制宣云得卿等
壽酒與卿等內外同慶皇帝舉酒羣官上下又再拜三

呼萬歲舞蹈又再拜訖詣座所太官令酌酒以進侍中
執酒以出羣官等俱出謝酒訖就座太常卿引樂作止
如常儀其橫街南羣官應有常食者引就座如式餘退其羣官所獻甘露醇酎尚食等
所由竝其日平曉於樓之便門奉進會畢樓上褰簾羣
官各出就位立定典儀贊再拜羣官等俱再拜若臨時別有進止隨事贊
相垂簾羣官退

冊府元龜開元二十三年八月五日千秋節御花萼樓
宴羣臣御製千秋節詩序時小旱是日大澍雨百官等
咸上表賀 二十四年八月五日千秋節帝御廣達樓
宴羣臣奏九部樂內出舞人繩伎頒賜有差
天寶七載七月文武百官刑部尚書兼京兆尹蕭昭等
及宗子咸上表請改千秋節為天長節從之
舊唐書穆宗本紀元和十五年正月憲宗崩丙午即皇

帝位秋七月乙巳詔皇太后就安長樂朝夕承顏慈訓所加慶感兼極今月六日是朕載誕之辰奉迎皇太后於宮中上壽朕既深歡慰欲與臣下同之其日百寮命婦宜於光順門進名參賀朕於光順門內殿與百寮相見承爲常式丙午勅乙巳詔書載誕受賀儀宜停先是左丞韋綬奏行之宰臣以古無降誕受賀之禮奏罷之冊府元龜長慶元年七月庚子降誕日百寮於紫宸殿稱賀畢詣昭德門外命婦詣光順門竝進門奉賀皇太后二年七月甲午降誕日宰臣率百寮入閣奉賀訖又詣光順門進名賀皇太后

敬宗寶曆元年六月勅降誕日文武百寮於紫宸殿稱賀及詣光順門奉賀皇太后自今已後宜停國朝本無降誕日賀儀蓋長慶初尙書左丞韋綬率情上疏行此

禮至是方罷

蕙田案冊府元龜所載則降誕日稱賀之禮至敬宗方罷舊唐書穆宗紀以爲罷於穆宗時者非也但千秋節受朝賀開元禮已有之乃謂國朝本無降誕日賀儀者殆止據貞觀顯慶二禮而言耳

文宗太和七年八月中書門下奏請以十月十日爲慶成節著在令式是日陛下於宮中奉迎太皇太后與昆弟諸王盛陳宴樂羣臣詣延英門奉觴上千萬歲壽八年九月勅慶成節宜令百寮詣延英上壽仍令太常寺具儀注聞奏仍準上巳重陽例於曲江錫宴九年十月慶成節詔宰臣及文武百官慶成節赴延英殿庭奉觴稱賀禮畢錫宴於曲江亭

開成元年十月慶成節宴於延英殿太常進雲韶樂宰
臣及翰林學士赴宴又錫百僚宴於曲江二年九月
詔慶成節宜令京兆府準上巳重陽於曲江宴會文武
百寮奉觴宜權停

蕙田案聖節朝賀始於唐時元宗以後其禮
旋廢惟穆宗文宗復行之其餘諸帝降誕日
率集沙門道士講律論修法會以祈福祥而
已不朝賀其節名則元宗曰千秋節又改天
長節肅宗曰天成地平節文宗曰慶成節武
宗曰慶陽節宣宗曰壽昌節懿宗曰延慶節
僖宗曰應天節昭宗曰嘉會節哀帝曰乾和
節其餘皆不立節名
又案五代後唐莊宗曰萬壽節明宗曰應聖

節末帝曰千春節晉高祖曰天和節少帝曰
啟聖節漢高祖曰聖壽節隱帝曰嘉慶節周
太祖曰永壽節世宗曰天清節恭帝曰天壽
節其舉行朝賀之禮者晉高祖天福七年二
月王子天和節御武德殿宰臣率文武百官
上壽漢隱帝乾祐三年三月丙子嘉慶節御
廣政殿文武百寮上壽酒周太祖廣順元年
七月戊子永壽節御廣政殿百寮進酒上壽
二年七月壬午永壽節羣臣詣廣政殿上壽
世宗顯德元年九月乙未天清節御廣政殿
宰臣率文武百寮上壽二年九月己丑天清
節御廣政殿文武百寮上壽三年九月癸丑
天清節宰臣率百官詣廣政殿上壽四年九

月丁未天清節百辟上壽五年九月壬子天清節臣寮詣廣德殿上壽

宋史真宗本紀至道三年十二月癸巳承天節羣臣上壽於崇政殿

大中祥符二年十二月辛巳詔晉國大長公主喪罷承天節上壽

禮志仁宗以四月十四日爲乾元節

仁宗本紀天聖元年夏四月丁未乾元節百官及契丹使初上壽於崇德殿

明道二年四月己酉罷乾元節上壽

英宗本紀治平元年春正月己亥壽聖節百官及契丹使初上壽於紫宸殿

禮志英宗以正月三日爲壽聖節禮官奏故事聖節上

壽親王樞密於長春殿宰臣百官於崇德殿天聖諒闇皆於崇政殿於是紫宸上壽羣臣升殿間飲獻一觴而退又一日賜宴於錫慶院

神宗本紀熙寧元年夏四月辛亥同天節羣臣及遼使初上壽於紫宸殿

陳隨隱上壽拜舞記紫宸殿上壽三十三拜三舞蹈初面西立閣門進班齊牌上升座鳴鞭禁衛起居移班北面躬身聽贊兩拜起直身搢笏三舞蹈跪左膝三叩頭出笏就一拜又兩拜躬身俟班首奏聖躬萬福再聽贊拜兩拜移班如初殿中監升殿詣酒罇所教坊起居殿侍進御茶牀又北面躬身聽贊拜兩拜直身立上公升殿注酒詣御座前躬進俯伏致詞竝躬身埃上公降階復位聽贊拜兩拜起躬身俟樞密

宣答聽贊拜兩拜移班如初上公升殿立御座東樂
作上飲畢上公受盞降階復位北面躬身聽贊拜兩
拜舞蹈如初不該赴座官先退赴座官躬身聽樞密
詣折檻東宣答訖聽贊拜兩拜升階立席後俟進酒
樂作上飲畢舍人贊各賜酒躬身聽贊拜兩拜起贊
各就坐立如故復贊乃坐酒行先上公次百官搢笏
執盞立席後躬身飲訖聽贊拜兩拜復坐食至搢笏
執碟出笏再進酒如上禮三行舍人曰可起立席後
俟上公御座前俛伏跪奏復位降階北面聽贊拜兩
拜舞蹈如初鳴鞭捲班

禮志熙寧三年以大早罷同天節上壽羣臣赴東上閤
門表賀中書門下言同天節上壽班自今樞密使副宣
徽三司使殿前馬步軍副都指揮使以上共作一班進
酒一醖親王宗室使相至觀察駙馬管軍觀察使以上
皆赴紫宸殿依本班序立上壽更不赴垂拱殿蓋以管
軍觀察使以上及親王駙馬並於垂拱殿以官序高下
各班進酒畢而日晏外朝有班者仍詣紫宸殿議者以
爲近瀆改焉而詔祖免以上宗婦聽班賀於禁中

哲宗本紀元祐二年十二月丙戌興龍節初上壽於紫
宸殿

徽宗本紀建中靖國元年冬十月丁酉天寧節羣臣及
遼使初上壽於垂拱殿

禮志徽宗以十月十日爲天寧節定上壽儀皇帝御垂
拱殿羣臣通班起居畢分班從義郎以下醫官待詔等
先退知引進司官一員讀奏目知東上閤門官一員奏
進壽酒由東階升舍人通教坊使以下贊再拜奏聖躬

萬福又再拜復位次看醖人稍前舍人贊再拜上殿祇候分東西兩陛立候進酒升殿次舍人引親王入殿庭北向立贊再拜班首奏萬福舍人引進奉西人列於親王後酒器檐牀置馬前揖天武躬奏萬福進奉馬先出內侍進御茶牀殿中監酌酒訖知東上閣門官殿上躬奏親王某以下進壽酒舍人揖親王以下躬贊再拜乃引親王二員升殿知東上閣門官引詣御座前舍人東階下西向立尙醖典御奉盤醖授班首搢笏受盤醖西向立奉御啟醖親王一員搢笏注酒班首奉詣御座東進訖少退虛跪興以盤授典御退閣門引降階舍人引當殿北向立東上贊拜興搢笏跪奉表舍人接表一員在東餘詣親王西置表笏上授引進知引進司官殿上讀奏目退親王以下俛伏興躬舍人贊再拜引班首升

東階餘殿下分立閣門引詣御座東北向搢笏尙醖典御如前奉盤立樂作皇帝飲訖受醖復位再拜如上儀知引進司官詣折檻東西向宣曰進奉收贊拜舞蹈又再拜西出親王以下赴紫宸殿立班引進官宣進奉出天武奉進奉以出閣門復立殿上教坊司贊送御酒又再拜教坊致語訖贊再拜退次樞密官上壽次管軍觀察以上上壽進奉竝如儀內侍舉御茶牀舍人贊教坊司以下謝祇應再拜訖閣門側奏無公事皇帝赴紫宸殿後閣受羣臣上壽質明三公以下百僚竝於殿門外就次東上閣門御史臺太常寺分引入詣殿庭東西立閣門附內侍進班齊牌皇帝出閣禁衛諸班親從迎駕自贊帝起居皇帝升座鳴鞭禮直官通事舍人引三公至執政官御史臺東上閣門分引百官竝橫行北向立

典儀贊再拜舞蹈班首奏萬福又再拜訖分東西立禮
直官引殿中監少監升東階詣酒尊所稍西南向西上
立舍人揖教坊司以下通班大起居次看釃人謝升殿
贊再拜內侍進御茶牀殿侍酌酒訖禮直官通事舍人
分引三公至執政官御史臺東上閣門分引百寮竝橫
行北向立典儀贊再拜贊者承傳在位官皆再拜禮直
官通事舍人引上公升東階東上閣門官接引升殿授
釃啟釃如上儀上公詣御座俛伏跪奏文武百僚上公
具官臣某等稽首言天宮令節臣等不勝大慶謹上千
萬歲壽俛伏興退降階舍人接引復位典儀贊再拜訖
禮直官引知樞密院官詣御座前承旨退詣折檻稍東
兩向宣曰得公等壽酒與公等內外同慶典儀贊拜如
儀前官分東西立禮直官通事舍人引上公升東階東

上閣門官接引詣御座東搯笏殿中監授盤上公奉進
御座東北向樂作皇帝飲訖閣門引接釃降復位典儀
贊拜如上儀宗室遙郡以下先退禮直官引樞密院官
詣御座前承旨退詣折檻稍東宣曰宣羣臣升殿典儀
贊拜訖禮直官通事舍人分引三公以下升東階親王
使相以下升西階御史臺東上閣門分引祕書監以下
升兩朵殿竝東西廊席後立尚醞典御以釃授殿中監
奉御啟釃殿中監西向立殿中少監以酒注於釃第一節
三準此
奉詣御座前躬進訖少退舉盤西向立樂作皇帝飲訖
殿中監接釃退授奉御出笏復位通事舍人分引殿上
官橫行北向舍人贊再拜典儀曰再拜贊者承傳皆再
拜舍人贊就坐各立席後復贊就坐羣臣皆坐酒初行
先宰臣次百官皆作樂尚食典御奉御進食太官設羣

官食皇帝再舉酒羣官興立席後樂作飲訖舍人贊就坐再行羣官酒皇帝三舉酒竝如第二之儀酒三行舍人曰可起羣官興立席後若宣示醖卽隨東上閣門官以下揖稱宣示醖躬贊就坐若宣勸卽立席後躬飲訖贊再拜內侍舉御茶牀禮直官引左輔詣御座前北向俛伏跪奏左輔具官臣某言禮畢俛伏興退復位禮直官通事舍人分引三公以下文武百僚降階橫行北向立樞密院官在親王後典儀贊再拜皆舞蹈再拜退欽宗本紀靖康元年夏四月己酉乾龍節羣臣上壽於紫宸殿

高宗本紀建炎元年五月癸卯天申節罷百官上壽

禮志建炎元年五月宰臣等上言請以五月二十一日爲天申節詔曰朕承祖宗遺澤獲託士民之上求所以扶危持顛之道未知攸濟念二聖鑾輿在遠萬民失業將士暴露夙夜痛心寢食幾廢況以眇躬之故聞樂飲酒以是爲樂乎非惟深拂朕志實增感於朕心所有將來天申節百官上壽常禮可令寢罷至是止就佛寺啟散祝壽道場詣閣門或後殿拜表稱賀

孝宗本紀淳熙十五年冬十月甲申會慶節詔北使百官詣東上閣門拜表起居免入賀

光宗本紀紹熙四年秋九月庚午重明節百官上壽

寧宗本紀紹熙五年七月卽皇帝位冬十月丙午復以朱熹奏請卻瑞慶節賀表

度宗本紀咸淳四年夏四月庚寅乾會節帝御紫宸殿羣臣稱賀

遼史禮志皇帝生辰朝賀儀臣僚國使班齊皇帝陞殿

坐臣僚使副入合班稱賀合班出皆如皇太后生辰儀
中書令北大王奏諸道進奉表日教坊起居七拜臣僚
東西門入合班再拜贊進酒班首上殿進酒宣徽使宣
答羣臣謝宣諭分班奏樂皇帝卒飲合班班首下殿分
班出皆如正旦之儀進奉皆如皇太后生辰儀皇帝詣
皇太后殿近上皇族外戚大臣竝從奉迎太后卽皇帝
殿坐皇太后御小輦皇帝輦側步從臣僚分行序引宣
徽使諸司閤門攢隊前引教坊動樂控鶴起居四拜引
駕臣僚竝於山樓南方立候皇太后入閤揖使副并臣
僚入幕次皇太后陞殿坐皇帝東方側坐引契丹漢人
臣僚使副兩洞門入合班起居舞蹈五拜贊各祗候面
殿立皇帝降御座殿上立進皇太后生辰物過畢皇帝
殿上再拜殿上下臣僚皆拜皇帝陞御座引臣僚分班

出契丹臣僚入謝宣宴漢人臣僚使副入通名謝宣宴
上殿就位不應坐臣僚出從人入皆如儀御牀入皇帝
初進皇太后酒皇太后賜皇帝酒皆如皇太后生辰儀
贊各就坐行酒宣飲盡就位謝如儀殿上一進酒畢從
人入就位如儀親王進酒行餅茶教坊致語如儀行茶
行般饌如儀七進酒使相樂曲終從人起曲破臣僚使
副起餘皆如正旦之儀

太宗本紀天顯三年冬十月甲子天授節上御五鸞殿
受羣臣及諸國使賀

會同四年十一月以永甯天授二節竝受賀著令
穆宗本紀應歷十四年秋八月戊申以生日值天赦不
受賀十七年八月辛酉生日以政事令阿不底病亟
不受賀

聖宗本紀統和元年冬十二月戊申千齡節祭日月禮
畢百僚稱賀 二十七年冬十二月辛卯皇太后崩於
行宮己酉詔免賀千齡節

金史禮志元日聖誕上壽儀

具元旦朝賀門

蕙田案上壽儀與元日同惟致詞則云萬春
令節謹上壽卮伏惟皇帝陛下萬歲萬歲萬

萬歲宣答云得卿壽酒與卿等內外同慶

熙宗本紀皇統三年正月乙巳萬春節如正旦儀

世宗本紀大定二十八年三月丁酉朔萬春節御慶和
殿受羣臣朝復宴於神龍殿諸王公主以次捧觴上壽
上驩甚以本國音自度曲蓋言臨御久春秋高渺然思
國家基緒之重萬世無窮之託以戒皇太孫當修身養
德善於持守及命太尉左丞相克寧盡忠輔導之意於

是上自歌之皇太孫及克寧和之極驩而罷

章宗本紀明昌元年九月壬子朔天壽節以世宗喪不

受朝 二年九月丁未朔天壽節以皇太后喪不受朝

三年九月庚午朔天壽節以皇太后喪不受朝 四

年九月甲子朔天壽節御大安殿受親王百官及宋高

麗夏使朝賀

承安二年秋七月戊辰天壽節御紫宸殿受朝

宣宗本紀貞祐四年二月戊戌免親王公主長春節入

賀致禮

興定元年二月庚戌諭旨曰時方多難將來長春節亦

免賀禮 三年三月己卯長春節免朝賀 四年三月

癸卯長春節詔免朝 五年三月戊戌長春節免朝

元光二年三月丙辰長春節免朝

哀宗本紀天興二年八月乙未萬年節州郡以表來賀
二十餘所

元史世祖本紀至元八年八月己未聖誕節初立內外
仗及雲和署樂位十一月乙亥劉秉忠及王磐徒單公
履等言元正朝會聖誕詔赦及百官宣敕具公服迎拜
行禮從之

禮樂志天壽聖節受朝儀如元正儀

世祖至元八年秋八月己未初起朝儀先是至元六
年春正月甲寅太保劉秉忠大司農孛羅奉旨命趙
秉溫史扛訪前代知禮儀者肄習朝儀既而秉忠奏
曰一人習之雖知之莫能行也得旨許用十人遂徵
儒生周鐸劉允中尙文岳忱關思義侯祐賢蕭琬徐
汝嘉從亡金故老烏古倫居貞完顏復昭完顏從愈

葛從亮于伯儀及國子祭酒許衡太常卿徐世隆稽
諸古典參以時宜洽情定制而肄習之百日而畢秉
忠復奏曰無樂以相須則禮不備奉旨搜訪舊教坊
樂工得杖鼓色楊皓笛色曹楫前行色劉進教師鄭
忠依律運譜被諸樂歌六月而成音聲克諧陳於萬
壽山便殿帝聽而善之秉忠及翰林太常奏曰今朝
儀既定請備執禮員有旨命丞相安童大司農孛羅
擇蒙古宿衛士可習容止者二百餘人肄之期月七
年春二月奏以丙子觀禮前期一日布綿蕝金帳殿
前帝及皇后臨觀於露階禮文樂節悉無遺失冬十
有一月戊寅秉忠等奏請建官典朝儀帝命與尙書
省論定以閏八年春二月立侍儀司以忽都於思也
先乃爲左右侍儀奉御趙秉溫爲禮部侍郎兼侍儀

司事周鐸劉允中爲左右侍儀使尚文岳忱爲左右直侍儀事關思義侯祐賢爲左右侍儀副使蕭琬徐汝嘉爲僉左右侍儀事烏古倫居貞爲承奉班都知完顏復昭爲引進副使葛從亮爲侍儀署令于伯儀爲尚衣局大使夏四月侍儀司奏請製內外仗如歷代故事從之秋七月內外仗成遇八月帝生日號曰天壽聖節用朝儀自此始

成宗本紀元貞二年秋九月辛未聖誕節帝駐蹕安同泊受諸王百官賀

大德二年秋九月己丑聖誕節駐蹕阻嬀之地受諸王百官賀 三年秋九月癸未聖誕節駐蹕古柵受諸王百官賀 九年秋九月戊申聖誕節帝駐蹕於壽寧宮受朝賀

文宗本紀至順元年春二月中書省臣言舊制正旦天壽節內外諸司各有贊獻頌者罷之今江浙省臣言聖恩公溥覆幬無疆而臣等殊無補報凡遇慶禮進表稱賀請如舊制爲宜從之

順帝本紀至正十九年夏四月以天下多故卻天壽節朝賀詔羣臣曰朕方今宜敬天地法祖宗以自修省朕初度之日羣臣毋賀庚午左丞相太平暨文武百官奏曰天壽節朝賀乃臣子報本實合禮典今謙讓不受固陛下盛德然今軍旅征進君臣名分正宜舉行不允王申皇太子復率羣臣上奏曰朝賀祝壽是祖宗以來舊行典故今不行有乖於禮帝曰今盜賊未息萬姓荼毒正朕恐懼修省敬天之時奈何受賀以自樂乙亥御史大夫帖里帖木兒復奏曰天壽朝賀之禮蓋出於臣子

之誠伏望陛下曲徇所請若朝賀之後內廷燕集特賜除免亦古者人君減膳之意仍乞宣示中書使內外知聖天子憂勤惕厲至於如此帝曰為朕缺於修省以致萬姓塗炭今復朝賀燕集是重朕之不德當候天下安甯行之未晚卿等其無復言卒不聽

王圻續通考洪武元年定朝賀儀凡冬至聖節朝會宴享皆同其聖節致詞皇太子則云茲遇父皇陛下聖誕之辰謹率諸弟某等敬祝萬萬歲壽丞相則云茲遇皇帝陛下聖誕之辰謹率文武百僚敬祝萬萬歲壽不傳制

明太祖實錄五年八月庚辰帝曰正旦為歲之首天運維新人君法天出治禮亦宜之生辰冬至至於文繁矣昔唐太宗謂生辰是父母劬勞之日况朕皇考皇妣早逝

每於是日不勝悲悼忍受天下賀乎宜皆罷之

王圻續通考洪武十三年九月上以古人父母既沒生日當倍悲痛即位以來常不受賀至是李善長等累請乃許之其在位諸司五品以上者自明年始聽其表賀明會典萬壽聖節百官朝賀儀洪武二十六年定儀與正旦冬至同但致詞云恭惟皇帝陛下萬壽令節臣某等誠懼誠忭敬祝萬萬歲壽不傳制凡進表箋洪武二十六年定天壽聖節在外五品以上衙門止進表文一通

續文獻通考天順五年十一月丁未以冬至萬壽節同日改致詞宣表等儀禮部言二節慶賀致詞各異又冬至傳制聖節不傳制今請通致詞曰茲遇律應黃鐘日當長至恭惟皇帝陛下萬壽聖節膺乾納佑奉天永昌

臣某等誠懼誠怖敬祝萬萬歲壽然後惟以冬至制詞傳答羣臣其各王府及在外文武衙門二節賀表若前後宣讀不無重複請通宣表目又通宣表文曰忻逢長至恭遇聖旦其在外文武衙門至日行告天祝壽禮宜曰今茲冬至恭遇聖旦聖壽益增從之

明會典弘治十七年敬皇帝萬壽聖節以孝肅太皇太后山陵襄事百官服錦繡於奉天門行五拜三叩頭禮正德十六年肅皇帝萬壽聖節以武宗山陵未畢令天下齋進表文竝公侯駙馬伯儀賓進賀綵緞俱免宣讀

陳設

嘉靖二年肅皇帝萬壽聖節以孝惠皇太后服制未滿先期免習儀至日早於奉先殿行孝慈高皇后忌辰祭禮畢上服黃袍御奉天殿錦衣衛設鹵簿駕如常儀鳴

鐘鼓鳴鞭教坊司作樂文武百官具朝服先行四拜禮致詞又四拜免雞唱山呼舞蹈等禮表文綵緞免宣讀

陳設

世宗實錄嘉靖十四年八月中萬壽聖節禮部請先期習儀詔以廟建未成祖考未安朕生辰豈宜受賀至日止常服御殿如朔望日儀禮部又請是日教坊司設樂於奉天門北面百官公服鴻臚寺仍具班首官名致詞行五拜禮其表文方物俱免陳設從之

右聖節朝賀

